



李太白集 二

柳田文庫

文庫11

D 125

2



藏

李太白文集卷第六

歌詩三十三首

樂府四

高句驪

金花折風帽白馬小遲回翩翩舞廣袖似鳥海東來

靜夜思

牀前看月光疑是地上霜舉頭望山月低頭思故鄉

淶水曲

淶水明秋日南湖採白蘋荷花嬌欲語愁殺蕩舟人

鳳臺曲

嘗聞秦帝女傳得鳳皇聲是日逢仙子當時別有情

文庫 11
D 125
2

柳田泉文庫

010190553065

李六
人吹彩簫去天借綠雲迎心一作曲在身不返空餘弄玉名

猛虎行一作吟

朝作猛虎行暮作猛虎吟一作行亦猛虎吟腸斷非關隴頭水淚下不為雍門琴於旌一作旌旗續紛兩河道戰鼓驚山欲傾倒秦人半作燕地囚胡馬翻銜洛陽草一輪一失關下兵朝降夕叛幽薊城巨鼉未斬海水動魚龍奔走安得寧頗似楚漢時翻覆無定止朝過博浪沙暮入淮陰市張良未遇韓信貧劉項存亡在兩臣暫到下邳受兵略來投漂母作主人賢哲恹恹古如此今時亦棄青雲士有策不敢犯龍鱗竄身南國避

胡塵寶書玉劍挂高閣金鞍駿馬散故人昨日方為宣城客掣鈴交通二千石有時六博快壯心一作快心遶牀三匝呼一擲楚人每道張旭竒心藏風雲世莫知三吳邦伯皆一作多顧眄四海雄俠兩追隨一作皆相推蕭曹曾作沛中吏攀龍附鳳當有時溧陽酒樓三月春楊花茫茫一作漢漢愁殺人胡鷄綠眼吹玉笛吳歌白紵飛梁塵丈夫相見一作列處且為樂槌牛搥鼓會衆賓我從此去釣東海得魚笑寄情相親

從軍行

從軍玉門道逐虜金微山笛奏梅花曲刀開明月環鼓聲鳴海上兵氣擁雲間願斬單于首長驅靜鐵關

秋思

春陽如昨日碧樹鳴黃鸝蕪然蕙草暮颯爾涼風吹
天秋木葉下月冷莎雞悲坐愁羣芳歇白露凋華滋
春思
燕草如碧絲秦桑低綠枝當君懷歸日是妾斷腸時
春風不相識何事入羅帷

秋思

關氏黃葉落妾望白登臺海上一作月出碧雲斷單于一作蟬聲秋
色來胡兵沙塞合漢使玉關回征客無歸日空悲蕙
草摧

子夜吳歌 春夏秋冬

秦地羅敷女採桑綠水邊素手青條上紅粧白日鮮
蠶飢妾欲去五馬莫留連

春

鏡湖三百里菡萏發荷花五月西施採人看隘若耶
回舟不待月歸去越王家

夏

長安一片月萬戶擣衣聲秋風吹不盡揔是玉關情
何日平胡虜良人罷遠征

秋

明朝驛使發一夜絮征袍素手抽針冷那堪把剪刀
裁縫寄遠道幾日到臨洮

冬

對酒

松子棲金華安期入蓬海此人古之仙羽化竟何在
浮生速流電倏忽變光彩天地無凋換容顏有遷改
對酒不肯飲含情欲誰待

估客樂

海客乘天風將舩遠行役譬如雲中鳥一去無蹤跡

少年行

君不見淮南少年游俠客白日毬獵夜擁擲呼盧百
萬終不惜報讎千里如咫尺少年遊俠好經過渾身
裝束皆綺羅蘭蕙相隨喧妓女風光去處滿笙歌驕

矜自言不可有俠士堂中養來久好鞍好馬乞與人
十千五千旋沽酒赤心用盡爲知己黃金不惜栽桃
李桃李栽來幾度春一回花落一回新府縣盡爲門
下客王侯皆是平交人男兒百年且樂命何須徇書
受貧病男兒百年且榮身何須徇節甘風塵衣冠半
是征戰士窮儒浪作林泉民遮莫枝根長百丈不如
當代多還往遮莫親姻連帝城不如當身自簪纓看
取富貴眼前者何用悠悠身後名

擣衣篇

閨裏佳人年十餘嚙蛾對影恨離居忽逢江上春歸
鷺銜得雲中尺素書玉手開緘長歎息狂夫猶戍交

河北萬里交河水北流願爲雙鳥泛中洲君邊雲擁
青絲騎妾處苔生紅粉樓樓上春風日將歇誰能攬
鏡看愁髮曉吹眞管隨落花夜擣戎衣向明月明月
高高刻漏長眞珠簾箔掩蘭堂橫垂寶幄同心結半
拂瓊筵蘇合香瓊筵寶幄連枝錦燈燭熒熒照孤寢
有使憑將金剪刀爲君留下相思枕摘盡庭蘭不見
君紅巾拭淚坐氤氳明年更若征邊塞願作陽臺一
段雲

去婦詞

古來有棄婦棄婦有歸處今日妾辭君辭君遣何去
本家零落盡慟哭來時路憶昔未嫁君聞君却周旋
綺羅錦繡段有贈黃金千十五許嫁君二十移所天
自從結髮日未幾離君緬山川家家盡歡喜孤妾長
自憐幽閨多怨思盛色無十年相思若循環枕席生
流泉流泉咽不掃獨夢關山道及此見君歸君歸妾
已老物華惡衰賤新寵方妍好掩淚出故房傷心劇
秋草自妾爲君妻君東妾在西羅幃到曉恨玉兒一
生啼自從離別久不覺塵埃厚常嫌玳瑁孤猶羨鴛
鴦偶歲華逐霜霰賤妾何能久寒沼落芙蓉秋風散
楊柳以此顛顛顏空持舊物還餘生欲何寄誰肯相
牽攀君恩旣斷絕相見何年月悔傾連理杯虛作同
心結女蘿附青松貴欲相依投浮萍失綠水教作若

李六
五
為流不歎君棄妾自歎妾緣業憶昔初嫁君小姑纔
倚牀今日妾辭君小姑如妾長回頭語小姑莫嫁如
兄夫

長歌行

桃李得日開榮華照當年東風動百物草木盡欲言
枯枝無醜葉涸水吐清泉大力運天地義和無停鞭
功名不早著竹帛將何宣桃李務青春誰能貫白日
富貴與神仙蹉跎成兩失金石猶銷鑠風霜無久質
畏落日月後強歡歌與酒秋霜不惜人倏忽侵蒲柳

長相思

日色欲盡花含煙月明欲素愁不眠趙瑟初停鳳凰
柱蜀琴欲奏鴛鴦絃此曲有意無人傳願隨春風寄
燕然憶君迢迢隔青天昔時橫波目今為流淚泉不
信妾腸斷歸來看取明鏡前

歌吟上

襄陽歌襄漢

落日欲沒峴山西倒著接羅一作行客辭歸花下迷襄陽小兒
齊拍手攔街爭唱白銅鞮傍人借問笑何事笑殺山
公醉似泥鷓鴣杓鸚鵡盃百年三萬六千日一日須
傾三百盃遙看漢水鴨頭綠恰似蒲萄初醱醅此江
若變作春酒壘麴便築糟丘臺千金駿馬換少妾醉
坐雕鞍歌落梅車傍側挂一壺酒鳳笙龍管行相催

咸陽市中歎黃犬何如月下傾金罍君不見晉朝羊
公一片古碑材龜頭剝落生莓苔淚亦不能為之墮
心亦不能為之哀誰能憂彼身後事金鳥銀鴨葬死
灰清風朗月不用一錢買玉山自倒非人推舒州杓
力士鐺一作黃金爵白玉瓶李白一作酒仙與爾同死生襄王雲雨今安
在江水東流猿夜聲

南都行

南都信佳麗武關橫西關白水真人居萬商羅鄜闈
高樓對紫陌甲第連青山此地多英豪邈然不可攀
陶朱與五穀名播天壤間麗華秀玉色漢女嬌朱顏
清歌遏流雲艷舞有餘閑遨遊盛宛洛冠蓋隨風還

走馬紅陽城呼鷹白河灣誰識卧龍客長吟愁鬢班

江上吟一作江上遊

木蘭之枻沙棠舟玉簫金管坐兩頭美酒樽一作當中置
千斛載妓隨波任去流仙人有待乘黃鶴海客無心
隨一作狎白鷗屈平詞賦懸日月楚王臺榭空山丘興酣
落筆搖五岳詩成嘯傲凌滄洲功名富貴若長在漢
水亦應西北流

侍從宜春苑奉詔賦龍池柳色初青聽新鶯

百轉歌長安

東風已綠瀛洲草紫殿紅樓覺春好池南柳色半青
青縈煙裊娜拂綺城垂絲百尺挂雕楹上有好鳥相

和鳴聞關早得春風情春風卷入碧雲去千門萬戶
皆春聲是時君王在鎬京五雲垂暉耀紫清仗出金
宮隨日轉天回玉輦繞花行始向蓬萊看舞鶴還過
蒞若聽新鷲新鷲飛繞上林苑願入簫韶雜鳳笙

玉壺吟

烈士擊玉壺壯心惜暮年三盃拂劍舞秋月忽然高
詠涕泗漣一作秋月鳳凰初下紫泥詔謁帝稱觴登御
筵揄揚九重萬乘主謔浪赤墀青瑣賢朝天數換飛
龍馬勅賜珊瑚白玉鞭世人不識東方朔大隱金門
是謫仙西施宜笑復宜嘖醜女効之徒集身君王雖
愛蛾眉好無奈宮中妬殺人

笑歌行

笑矣乎笑矣乎君不見曲如鉤古人知爾封公侯君
不見直如絃古人知爾死道邊張儀所以只掉三寸
舌蘇秦所以不墾二頃田笑矣乎笑矣乎君不見滄
浪老人歌一曲還道滄浪濯吾足平生不解謀此身
虛作離騷遣人讀笑矣乎笑矣乎趙有豫讓楚屈平
賣身買得千年名巢由洗耳有何益夷齊餓死終無
成君愛身後名我愛眼前酒飲酒眼前樂虛名何處
有男兒窮通當有時曲腰向君君不知猛虎不看机
上肉洪爐不鑄囊中錐笑矣乎笑矣乎甯武子朱買
臣叩角行歌背負薪今日逢君君不識豈得不如佯

狂人

悲歌行

悲來乎悲來乎主人有酒且莫斟聽我一曲悲來吟
悲來不吟還不笑天下無人知我心君有數斗酒我
有三尺琴琴鳴酒樂兩相得一杯不啻千鈞金悲來
乎悲來乎天雖長地雖久金玉滿堂應不守富貴百
年能幾何死生一度人皆有孤猿坐啼墳上月且須
一盡杯中酒悲來乎悲來乎鳳鳥不至河無圖微子
去之箕子奴漢帝不憶李將軍楚王放却屈大夫悲
來乎悲來乎秦家李斯早追悔虛名撥向身之外范
子何曾愛五湖功成名遂身自退劔是一夫用書能
知姓名惠施不肯千萬乘卜式未必窮一經還須黑
頭取方伯莫謾白首爲儒生

幽歌行上新平長史兄粲

陝西

幽谷稍稍振庭柯涇水浩浩揚湍波哀鴻酸嘶暮聲
急愁雲蒼慘寒氣多憶昨去家此爲客荷花初紅柳
條碧中宵出飲三百盃明朝歸揖二千石寧知流寓
變光輝胡霜蕭颯繞客衣寒灰寂寞竟誰暖落葉飄
揚何處歸吾兄行樂窮曠旭滿堂有美顏如玉趙女
長歌入彩雲燕姬醉舞嬌紅燭狐裘獸炭酌流霞壯
士悲吟寧見嗥前榮後枯相翻覆何惜餘光及棣華

西岳雲臺歌送丹丘子

李

乙

西岳崢嶸何壯哉黃河如絲天際來黃河萬里觸山
動盤渦轂一作谷轉秦地雷榮光休氣紛五彩千年一清
聖人在巨靈咆哮擘兩山洪波噴流射東海一作箭射流東海
三峯却立如欲摧翠崖丹谷高掌開白帝金精運元
氣石作蓮花雲作臺雲臺閣道連窈冥一作人不到中有不
死丹丘生明星玉女備灑掃麻姑搔背指爪輕我皇
手把天地戶丹丘談天與天語九重出入生光輝東
求蓬萊復西歸玉漿儻惠故人飲騎二茅龍上天飛

元丹丘歌

元丹丘愛一作好神仙朝飲潁川一作水之清流暮還嵩岑之
紫煙三十六峯長周旋長周旋躡星虹身騎飛龍耳

生風橫河跨海與天通我知爾遊心無窮

扶風豪士歌

洛陽三月飛胡沙洛陽城中人怨嗥天津流水波赤
血白骨相撐如亂麻我亦東奔向吳國一作來奔浮雲
四塞道路賒東方日出啼早鴉城門人開掃落花梧
桐楊柳拂金井來醉扶風豪士家扶風豪士天下奇
意氣相傾山可移作人不倚將軍勢飲酒豈顧尚書
期雕盤綺食會衆客吳歌趙舞香風吹原嘗春陵六
國時開心寫意君所知堂中各有三千士明日報恩
知是誰撫長劍一揚眉清水白石何離離脫吾帽向
君笑飲君酒爲君吟張良未逐赤松去橋邊黃石知

我心

同族弟金城尉叔一作卿燭照山水壁畫歌

高堂粉壁圖蓬瀛燭前一見滄洲清
洪波洶湧山崢嶸皎若丹丘隔海望
赤城光中乍喜嵐氣滅謂逢山陰晴後雪
迴谿碧流寂無喧又如秦人月下窺花源
了然不覺清心魂祇將疊嶂鳴秋猿與君
對此歡未歇放歌行吟達明發却顧海客揚
雲帆便欲因之向溟渤

白毫子歌

淮南小山白毫子乃在淮南小山裏
夜卧松下雪朝食石中髓
小山連一作聯絲向江開碧峯巉巖
淥水迴余

配白毫子獨酌流霞盃
拂花弄琴坐青苔
綠蘿樹下春風來
南窓蕭颯松聲起
憑崖一聽清心耳
可得見一作不得親
八公攜手五雲去
空餘桂樹愁殺人

李太白文集卷第六

吳門繆是武子甫重刊宋本

李太白文集卷第七

歌詩六十八首

歌吟下

梁園吟

一作梁園醉
酒歌梁宋

我浮

一作乘

黃河

一作雲

去京關挂席欲進

一作往

波連山天長水

闊厭遠涉訪古始及平臺間平臺為客憂思多對酒

一作醉來遂作梁園歌却憶蓬池阮公詠因吟淶水揚洪波

洪波浩蕩迷舊國路遠西歸安可得人生達命豈假

愁且飲美酒登高樓平頭奴子搖大扇五月不熱疑

一作如清秋玉素盤楊梅為君設吳鹽如花皎白一作如雪

持鹽把酒但飲之莫學夷齊事高潔一作比雲月又作孤高

出書昔人豪貴信陵君今人耕種信陵墳荒城虛

遠一作照碧山月古木盡入蒼梧雲梁王宮闕一作賓客今安

在枚馬先歸不相待舞影歌聲散淶池空餘汴水東

流海沉吟此事淚滿衣黃金買醉未能一作莫言歸連呼五

白行一作投六博分曹賭酒酣一作看馳暉酣一作看馳暉歌且謠

意方遠東山高卧時一作忽起來欲濟蒼生未應晚

鳴臯歌送岑徵君時梁園三尺雪

若有人兮思鳴臯阻積雪兮心煩勞洪河凌兢不可

以徑度冰龍鱗兮難容舳邈仙山一作神仙之峻極兮聞天

籟之嘈嘈霜崖縞皓以合沓兮若長風一作虹扇海湧滄

溟之波濤玄猿綠熊舔談岌一作岌危咆柯振石駭膽慄

魄羣呼而相號峯崢嶸以路絕挂星辰於巖嶽送君

之歸兮動鳴臯之新作交鼓吹兮彈絲觴清泠之池

閣君不行兮何待若返顧之黃鶴掃梁園之羣英振

大雅於東洛中征軒兮歷阻折尋幽居兮越巘粵盤

白石兮坐素月琴松風兮寂一作昇萬壑望不見兮心氛

氲蘿冥冥兮霰紛紛水橫洞以下淶波小聲而上聞

虎嘯谷而生風龍藏谿而吐雲冥一作寡鶴清唳飢鼯嘯

呻塊獨處此幽默兮愀一作啼空山而一作愁人雞聚族以

爭食鳳孤飛而無鄰蝦蟇嘲龍魚目混珍嫫母衣錦

西施負薪若使巢由桎梏於軒冕兮亦奚異乎夔龍

蹇蹇於風塵哭何苦而救楚笑何誇而却秦吾誠不

能學二子沽名矯節以耀世兮固將棄天地而遺身白
鷗兮飛來長與君兮相親

鳴臯歌奉餞從翁清歸五崖山居

昨憶鳴臯夢裏還手弄素月清潭間覺時枕席非碧
山側身西望阻秦關麒麟閣上春還早著書却憶伊
陽好青松來風吹石道綠蘿飛花覆煙草我家仙公
愛清真才雄草聖凌古人欲卧鳴臯絕世塵鳴臯微
茫在何處五崖峽一作溪水橫樵路身披翠雲裘袖拂紫
煙一作雲去去時應過嵩少間相思為折三花樹

僧伽歌

真僧法號號僧伽有時與我論三車問言誦呪幾千
徧口道恒河沙復沙此僧本住南天竺為法頭陀來
此國戒得長天秋月明心如世上青蓮色意清淨兒
稜稜亦不減亦不增瓶裏千年舍利骨手中萬歲胡
孫藤嗟予落泊江淮久罕遇真僧說空有一言懺盡
波羅夷再禮渾除犯輕垢

白雲歌送劉十六歸山

楚山秦山皆白雲白雲處處長隨君君長隨君君入楚
山裏雲亦隨君渡湘水湘水上女羅衣白雲堪卧君
早歸

金陵歌送別范宣

金陵

石頭巉巖如虎踞凌波欲過滄江去鍾山龍盤走勢

來秀色橫分歷陽樹四十餘帝三百秋功名事跡隨
東流白馬小兒誰家子泰清之歲來關囚一作白馬金鞍誰家子吹
鳳皇樓金陵昔時何壯哉席卷英豪天下來冠蓋散
為煙霧盡金輿玉座成寒灰扣劍悲吟空咄嗟梁陳
白骨亂如麻天子龍沉景陽井誰歌玉樹後庭花此
地傷心不能道目一作下離離長春草送爾長江萬里
心他年來訪南山皓

勞勞亭歌

在江寧縣南十五里古送別之所一名臨滄觀

金陵勞勞送客堂蔓草離離生道傍古情不盡東流
水此地悲風愁白楊我乘素舸同康樂朗詠清川飛
夜霜昔聞牛渚吟五章今來何謝袁家郎苦竹寒聲
動秋月獨宿空簾歸夢長

橫江詞六首

人言橫江好儂道橫江惡一風三日吹倒山一作猛風吹倒天門
山白浪高於瓦官閣

海潮南去過尋陽牛渚由來險馬當橫江欲渡風波
惡一水牽愁萬里長

橫江西望阻西秦漢水東連一作楚水東流揚子津白浪如
山那可渡狂風愁殺峭帆人

海神來過惡風迴浪打天門石壁開浙江八月何如
此濤似連山噴雪來

橫江館前津吏迎向余東指海雲生郎今欲渡緣何

事如此風波不可行

月暈天風霧不開海鯨東感百一作衆川迴驚波一起三
山動公無一作莫渡河歸去來

金陵城西樓月下吟

金陵夜寂一作靜涼風發獨上高一作西樓望吳越白雲映水

搖空一作秋城白露垂珠滴秋月一作沾衣月下沉一作長吟久

不歸古來一作今相接眼中稀解道澄江淨如練令人長

一作還憶謝玄暉

東山吟

去江寧城三十五里晉謝安攜
妓之所一云醉過謝安東山

攜妓東土山悵然悲謝安我妓今朝如花月他妓古
墳荒草寒白雞夢後五一作三百歲洒酒澆君同所懽酣

來自作青海舞秋風吹落紫綺冠彼亦一時此亦一

時浩浩洪流之一作高詠何必奇

秋浦歌十七首 秋浦

秋浦長似秋蕭條使人愁客愁不可渡行上東大樓

正西望長安下見江水流寄言向江水汝意憶儂不

遙傳一掬淚為我達揚州

秋浦猿夜愁黃山堪白頭青溪非隴水翻作斷腸流

欲去不得去薄遊成久遊何年是歸日雨淚下孤舟

秋浦錦駒鳥人間天上稀山雞羞渌水不敢照毛衣

兩鬢入秋浦一朝颯已衰猿聲催白髮長短盡成絲

秋浦多白猿超騰若飛雪牽引條上兒飲弄水中月

愁作秋浦客一作曲強看秋浦花山川如剡縣風日似長沙

醉上山公馬寒歌窸戚牛空吟白石爛淚滿黑貂裘

秋浦千重嶺水車嶺一作人行路最奇天傾欲墮石水拂寄

生枝

江祖一片石青天掃盡屏題詩留萬古綠字錦苔生

千千石楠樹萬萬女貞林山山白鷺一作鷗滿澗澗白猿

吟君莫向秋浦猿聲碎客心

邏人橫鳥道江祖出魚梁水急客舟疾山花拂面香

水如一疋練此地即平天耐可乘明月看花上酒船

淥水淨素月月明白鷺飛郎聽採菱女一道夜歌歸

爐火照天地紅星亂紫煙赦郎明月夜歌曲動寒川

白髮三千丈綠愁似箇長不知明鏡裏何處得秋霜

秋浦田舍翁採魚水中宿妻子張白鵬結罟映深竹

桃波一步地了了語聲聞閭與山僧別低頭禮白雲

當塗趙炎少府粉圖山水歌

峨眉高出西極天羅浮直與南溟連名工繹思揮彩

筆驅山走海置眼前滿堂空翠如可掃赤城霞氣蒼

梧煙洞庭瀟湘意渺漭三江七澤情洄沓驚濤洶湧

向何處孤舟一去迷歸年征帆不動亦不旋飄如隨

風落天邊心搖目斷興難盡幾時可到三山巔西峯

崢嶸噴流泉橫石蹙水波潺湲東崖合沓蔽輕霧深

林雜樹空芊緜此中冥昧失晝夜隱机寂聽無鳴蟬

長松之下列羽客對坐不語南昌仙南昌仙人趙夫
子妙年歷落青雲士訟庭無事羅衆賓杳然如在丹
青一作霄裏五色粉圖安足珍真山可以全吾身若待功
成拂衣去武陵桃花笑殺人

求王東巡歌十一首

求王軍中

求王正月東出師天子遙分龍虎旗樓船一舉風波
靜江漢翻爲鴈鷺池

三川北虜亂如麻四海南奔似永嘉但用東山謝安
石爲君談笑靜胡沙

雷鼓嘈嘈喧武昌雲旗獵獵過尋陽秋毫不犯三吳
悅春日遙看五色光

龍盤虎踞帝王州帝子金陵訪古丘春風試暖昭陽
殿明月還過鳩鵲樓

二帝巡遊俱未迴五陵松柏使人哀諸侯不救河南
地更喜賢王遠道來

丹陽北固是吳關盡出樓臺雲水間千巖烽火連滄
海兩岸旌旗繞碧山

王出三江按五湖樓船跨海次揚都戰艦森森羅虎
士征帆一一引龍駒

長風挂席勢難迴海動山傾古月摧君看帝子浮江
日何似龍驤出峽來

祖龍浮海不成橋漢武尋陽空射蛟我王樓艦輕秦

漢却似文皇欲渡遼

帝寵賢王入楚關掃清江漢始應還初從雲夢開朱
邱更取金陵作小山
試借君王玉馬鞭指麾戎虜坐瓊筵南風一掃胡塵
靜西入長安到日邊

上皇西巡南京歌十首

胡塵輕拂建章臺聖主西巡蜀道來劔壁門高五千
尺石為樓閣九天開

九天開出一成都萬戶千門入畫圖草樹雲山如錦
繡秦川得及此間無

德陽春樹似新豐行入新都若舊宮柳色未饒秦地

綠花光不減上林紅

誰道君王行路難六龍西幸萬人歡地轉錦江成渭
水天迴玉壘作長安

萬國同風共一時錦江何謝曲江池石鏡更明天上
月後宮親一作新得照娥眉

濯錦清江萬里流雲帆龍舸下揚州北地雖誇上林
苑南京還有散花樓

錦水東流繞錦城星橋北挂象天星四海此中朝聖
主峩眉山上一作下列仙庭

秦開蜀道置金牛漢水元通星漢流天子一行遺聖
跡錦城長作帝王州

水淥天青不起塵風光和暖勝三秦萬國煙花隨玉輦西來添作錦江春

劔閣重關蜀北門上皇歸馬若雲屯少帝長安開紫極雙懸日月照乾坤

峨眉山人月歌峽路

峨眉山人月半輪秋影入平羌江水流夜發清溪向三峽思君不見下渝州

峨眉山人月歌送蜀僧晏入中京

我在巴東三峽時西看明月憶峨眉一作峨眉山人月

照滄海與人萬里長相隨黃鶴樓前月華白此中忽見峨眉客峨眉山人月還送君風吹西到長安陌長安

大道橫九天峨眉山人月照秦川黃金師子承高座白

玉塵尾談重玄我似浮雲滯吳越君逢聖主遊丹闕

一振高名滿帝都歸時一作還弄峨眉月

赤壁歌送別江夏

二龍爭戰決雌雄赤壁樓船掃地空烈火張天照雲

海周瑜於此破曹公君去滄江望一作澄碧鯨鯢唐突

留餘跡一一書來報故人我欲因一作觀之壯心魄

江夏行

憶昔嬌小姿春心亦自持為言嫁夫聳得免長相思

誰知嫁商賈令人却愁苦自從為夫妻何曾在鄉土

去年下揚州相送黃鶴樓眼看帆去遠心逐江水流

只言期一載誰謂歷三秋使妾腸欲斷恨君情悠悠
東家西舍同時發北去南來不逾月未知行李遊何
方作箇音書能斷絕適來往南浦欲問西江船正見
當壚女紅粧二八年一種爲人妻獨自多悲恸對鏡
便垂淚逢人只欲啼不如輕薄兒且暮長追隨悔作
商人婦青春長別離如今正好同歡樂君去容華誰
得知

懷仙歌

一鶴東飛過滄海放心散漫知何在仙人浩歌望我
來應攀玉樹長相待堯舜之事不足驚自餘囂囂真
可輕巨鼇莫載三山去吾一作我欲蓬萊頂上行

玉真仙人詞

玉真之真一作仙人時往一作西上太華峯清晨鳴天鼓颺歛騰
雙龍弄電不輟手行雲本無蹤幾時入少室王母應
相逢

清溪行

宣城一作
宣州青溪

清溪清我心水色異諸水借問新安江見底何如此
人行明鏡中鳥度屏風裏向晚猩猩啼空悲遠遊子

謝朓佐明見贈五雲裘歌

謝朓宅在當
塗青山下

我吟謝朓詩上語朝風颯颯吹飛雨謝朓已沒青山
空後來繼之有殷公粉圖珍裘五雲色暎如晴天散
綵虹文章彪炳光陸離應是素娥玉女之所爲輕如

松花落金粉濃似苔錦含碧滋遠山積翠橫海島殘
霞霏丹映江草凝毫採掇花露容幾年功成奪天造
故人贈我我不違著令山水舍晴暉一作清輝頓驚謝康
樂詩興生我衣襟前林壑斂暝色袖上煙霞收夕霏
羣仙長歎驚此物千崖萬嶺相縈鬱身騎白鹿行飄
飄手翳紫芝笑披拂相如不足誇鷓鴣王恭鶴氅安
可方瑤臺雪花數千點片片吹落春風香爲君持此
凌蒼蒼上朝三十六玉皇下窺夫子不可及矯手相
思空斷腸

臨路歌

大鵬飛兮振八裔中天摧兮力不濟餘風激兮萬世

遊扶桑兮挂石袂後人得之傳此仲尼亡乎誰爲出涕

歷陽壯士勤將軍名思齊歌并序

歷陽壯士勤將軍神力出於百夫則天太后召見奇
之授游擊將軍賜錦袍玉帶朝野榮之後拜橫南將
軍大臣慕義結十友即燕公張說館陶公郭元振爲
首余壯之遂作詩

太古歷陽郡化爲洪川在江山猶鬱盤龍虎秘光彩
蓄洩數千載風雲何靈靈特生勤將軍神力百夫倍

草書歌行

少年上人號懷素草書天下稱獨步墨池飛出北溟
魚筆鋒殺盡中山兔八月九月天氣涼酒徒辭客滿

高堂牋麻素絹排數箱宣州石硯墨色光吾師醉後
倚繩牀須臾掃盡數千張飄風驟雨驚颯颯落花飛
雪何茫茫起來向筆不停手一行數字大如斗怳怳
如聞神鬼驚時時只見龍蛇走左盤右蹙如驚電狀
同楚漢相攻戰湖南七郡凡幾家家屏障書題徧
王逸少張伯英古來幾許浪得名張顛老死不足數
我師此義不師古古來萬事貴天生何必要公孫大
娘渾脫舞

古意

君爲女蘿草妾作兔絲花輕條不自引爲逐春風斜
百丈託遠松纏懸成一家誰言會面易各在青山崖
女蘿發馨香兔絲斷人腸枝枝相糾結葉葉竟飄揚
生子不知根因誰共芬芳中巢雙翡翠上宿紫鴛鴦
君識二草心海潮亦可量

山鷓鴣詞

苦竹嶺頭秋月輝苦竹南枝鷓鴣飛嫁得燕山胡鴈
婿欲銜我向鴈門歸山雞翟雉來相勸南禽多被北
禽欺紫塞嚴霜如劒戟蒼梧欲巢難背違我心誓死
不能去哀鳴驚叫淚霑衣

和盧侍御通塘曲

君誇通塘好通塘勝耶溪通塘在何處宛在尋陽西
青蘿嫋嫋拂煙樹白鷗處處聚沙堤石門中斷平湖

出百丈金潭照雲日何處滄浪垂釣翁鼓棹漁歌趣
非一相逢不相識出沒繞通塘浦邊清水明素足別
有浣紗吳女郎行盡淥潭潭轉幽疑是武陵春碧流
秦人雞犬桃花裏將比通塘渠見羞通塘不忍別十
去九遲迴偶逢佳境心已醉忽有一鳥從天來月出
青山送行子四邊苦竹秋聲起長吟白雪望星河雙
垂兩足揚素波梁鴻德耀會稽日寧知此中樂事多

李太白文集卷第七

吳門繆昌武子甫重刊宋本

李太白文集卷第八

歌詩四十一首

贈一

贈孟浩然

襄漢

吾愛孟夫子風流天下聞紅顏棄軒冕白首卧松雲
醉月頻中聖迷花不事君高山安可仰從此揖清芬

贈從兄襄陽少府皓

一作皓

結髮未識事所交盡豪雄却秦不受賞擊晉一作救趙寧為
功託身白刃裏殺人紅塵中當朝揖高義舉世欽英
風小節豈足言退耕春陵東歸來無產業生事如轉
蓬一朝狐一作鳥裘弊百鎰黃金空彈劍徒激昂出門悲路

窮吾兄青雲士然諾聞諸公所以陳片言片言貴情
通棟華儻不接甘與秋草同

贈張公洲革處士

列子居鄭圃不將衆庶分革侯遁南浦常恐楚人聞
抱甕灌秋蔬心閑遊天雲每將瓜田叟耕種漢水濱
時登張公洲入獸不亂羣并無桔槔事門絕刺繡文
長揖二千石遠辭百里君斯爲真隱者吾黨慕清芬

淮海對雪贈傅靄

一作淮南對雪贈孟浩然

朔雪落吳朝一作朝天從風渡溟渤海樹一作木成陽春江沙皓
明月飄飄四荒外想像千花發瑤草生階墀玉塵散
庭闕興從剡溪起思繞梁山發寄君郢中歌曲罷心

斷絕一云剡溪與空在郢路歌未歇寄君梁父吟曲盡心斷絕

贈徐安宜

白田見楚老歌詠徐安宜製錦不擇地操刀良在茲
清風動百里惠化聞京師浮人若雲歸耕種滿郊岐
川光淨麥隴日色明桑枝訟息但長嘯賓來或解頤
青槐拂戶牖一作碧水流園池遊子滯安邑懷恩未忍
辭繫君樹桃李歲晚託深期

贈任城盧主簿潛

魯中

海鳥知天風竄身魯門東臨觴不能飲矯翼思凌空
鍾鼓不爲樂煙霜誰與同歸飛未忍去流淚謝鴛鴻
早秋贈裴十七仲堪

遠海動風色吹愁一作秋落天涯南星變大火熱氣餘丹
霞光景不可迴六龍轉天車荆人泣美玉魯叟悲匏
瓜功業若夢裏一作中撫推琴發長嗟裴生信一作實英邁岨
起多才華歷抵海岱豪結交魯朱家一作歷遊道魏良
圖竟未展意欲飛丹砂破產且救人遺身不為家復
攜兩少女一作妾豔色驚荷花雙詞入青雲但惜白日斜
窮一作窮溟出寶貝大澤饒龍蛇明主儻一作必見收煙霄路
非賒知飛萬里道勿使歲寒差一作時命若有一會歸應鍊丹砂

贈范金鄉二首

君子枉清眄不知東走迷離家未幾月絡緯鳴中閨
桃李君不言攀花願成蹊那能吐芳信惠好相招攜

我有結綠珍久藏濁水泥時人棄此物乃與燕珉一作石
齊拂拭欲贈之申眉路無梯遼東慙白豕楚客羞山
雞徒有獻芹心終流泣玉一作血啼祇應自索漠留舌示
山妻

范宰不買名絃歌對前楹為邦默自化日覺冰壺清
百里雞犬靜千廬機杼鳴浮人少蕩析愛客多逢迎
遊子覩嘉政因之聽頌聲

贈瑕丘王少府

皎皎鸞鳳姿飄飄神仙氣梅生亦何事來作南昌尉
清風佐鳴琴寂寞道為貴一作誰貴為一見過所聞操持難
與羣毫揮魯邑訟目送瀛洲雲我隱屠釣下爾當玉

石分無由接高論空此仰清芬

東魯見狄博通

去年別我向何處有人傳道游江東謂言挂席度滄海却來應是無長風

見京兆韋參軍量移東陽二首

吳中

潮水還歸海流人却到吳相逢問愁苦淚盡日南珠聞說金華渡東連五百灘全勝若耶好莫道此行難猿嘯千谿合松風五月寒他年一攜手搖艇入新安

贈丹陽橫山周處士惟長

周子橫山隱開門臨城隅連峯入戶牖勝槩凌方壺時枉白紵詞放歌丹陽湖水色傲冥渤川光秀菰蒲

當其得意時心與天壤俱閑雲隨舒卷安識身有異

抱石恥獻王沉泉笑探珠羽化如可作相攜上清都

一作攜手
止清都

王真公主別館苦雨贈衛尉張卿二首

長安

愁坐金張館繁陰晝不開空煙送雨色蕭颯望中來翳翳昏墊苦沉沉憂恨催清秋何以慰白酒盈吾杯吟詠思管樂此人已成灰獨酌聊自勉誰貴經綸才彈劍謝公子無魚良可哀

苦雨思白日浮雲何由卷稷卨和天人陰陽仍驕蹇秋霖劇倒井昏霧橫絕巘欲往咫尺塗遂成山川限滾滾奔溜瀉浩浩驚波轉泥沙塞中途牛馬不可辨

飢從漂母食閑綴羽林一作簡園家逢秋蔬藜藿不滿眼
蠭蛸結思幽蟋蟀傷徧淺厨竈無青煙刀机生綠蘚
投筴解鷓鷄換酒醉北堂丹徒布衣者慷慨未可量
何時黃金盤一斛薦檳榔功成拂衣去搖裔滄洲旁

贈韋祕書子春

谷口鄭子真躬耕在巖石高名動京師天下皆藉藉
其人竟不起雲卧從所適苟無濟代心獨善亦何益
惟君家世者偃息逢休明談天信浩蕩說劍紛縱橫
謝公不徒然起來為蒼生祕書何寂寂無乃羈豪英
且復歸碧山安能戀金闕舊宅樵漁池蓬蒿已應沒
却顧女几峯胡顏見雲月徒為風塵苦一官已白髮

氣同萬里合訪我來瓊都披雲覩青天捫蝨話良圖
留侯將綺季出處未云殊終與安社稷功成去五湖

贈韋侍御黃裳二首

太華生長松亭亭凌霄雪天與百尺高豈為微颺折
桃李賣搖豔路人行且迷春光掃地盡碧葉成黃泥
願君學長松慎勿作桃李受屈不改心然後知君子
見君乘駱馬知上太山道此地果摧輪全身以為寶
我如豐年玉棄置秋田草但勗冰壺心無為歎衰老

贈薛校書

我有吳趨曲無人知此音姑蘇成蔓草麋鹿空悲吟
未誇觀濤作空鬱釣鼇心舉手謝東海虛行歸故林

贈何七判官昌浩

有時忽惆悵，匡坐至夜分。平明空嘯咤，思欲解世紛。
心隨長風去，吹散萬里雲。蓋作濟南生，九十誦古文。
不然拂劍起，沙漠收奇勲。老死田陌間，何因揚清芬。
夫子今管樂，英才冠三軍。終與同出處，豈將沮溺羣。

讀諸葛武侯傳書懷贈長安崔少府叔封昆季

漢道昔云季，羣雄方戰爭。霸圖各未立，割據資豪英。
赤伏起頽運，卧龍得孔明。當其南陽時，隴畝躬自耕。
魚水三顧合，風雲四海生。武侯立岷蜀，壯士吞咸京。
何人先見許，但有崔州平。余亦草間人，一作士頗懷拯物情。
晚途值子玉，華髮同衰榮。託意在經濟，結交為弟兄。
無令管與鮑，千載獨知名。

贈郭將軍

將軍少年出武威

一云將軍豪天威

入掌銀臺護紫微。平明

拂劍朝天去，薄暮垂鞭醉酒歸。愛子臨風吹玉笛，美

人騰一作向月舞羅衣。疇昔雄豪如夢裏，相逢且欲醉

春輝

一云今日相逢俱失路何年灞上弄春輝

駕去溫泉宮後贈楊山人

少年落托楚漢間，風塵蕭瑟多苦顏。自言介一作竟

誰許長吁莫錯還，閉關一朝君王垂拂拭。剖心輸丹

雪，曾臆忽蒙白日迴。景光直上青雲生，羽翼幸陪鸞

輦出鴻都身。騎飛龍，天馬駒。王公大人借顏色，金章

紫綬來相趨當時結交何紛紛片言道合唯有君待
吾盡節報明主然後相攜一作攜卧白雲

溫泉侍從歸逢故人

漢帝長揚苑誇胡羽獵歸子雲叨侍從獻賦有光輝
激賞搖天筆承恩賜御衣逢君奏明主他日共翻飛

贈裴十四

朝見裴叔則朗如行玉山黃河落天走東海萬里寫
入曾懷間身騎白黿不敢度金高南山買君顧徘徊
六合無相知飄若浮雲且西去

贈崔侍御

黃河三尺鯉本在孟津居點額不成龍歸來伴一作伴凡
魚故人東海客一見借吹噓風濤儻相因更欲凌崑
墟何當赤草使再往召相如

上李邕

大鵬一日同風起搏搖直上九萬里假令風歇時下
來猶能搗却滄溟水世人見我恒殊調見余大言皆
冷笑宣父猶能畏後生丈夫未可輕年少

述德兼陳情上哥舒大夫

天為國家孕英才森森矛戟擁靈臺浩蕩深謀噴江
海縱橫逸氣走風雷丈夫立身有如此一呼三軍皆
披靡衛青漫作大將軍白起真成一豎子

雪讒詩贈友人

四言

嗟余沉迷猖蹶已久五十知非古人常有立言補過
庶存不朽苞荒匿瑕蓄此頑醜月出致譏貽愧皓首
感悟遂晚事往日遷白璧何辜青蠅屢前羣輕折軸
下沈黃泉衆毛飛骨上陵青天萋菲暗成貝錦粲然
泥沙聚埃珠玉不鮮洪炎爍山發自織煙滄波蕩日
起乎微涓交亂四國播干八埏拾塵掇蜂疑聖猜賢
哀哉悲夫誰察余之貞堅彼婦人之猖狂不如鵠之
彊彊彼婦人之姪昏不如鷦之奔奔坦蕩一作皎皎君子無
悅箴言擢髮續罪罪乃孔多傾海流惡惡無以過人
生實難逢此織羅積毀銷金沉憂作歌天未喪文其
如余何姐已滅紂褒女惑周天維蕩覆職此之由漢

祖呂氏食其在傍秦皇太后毒亦姪荒蟬竦作昏遂
掩太陽萬乘尚爾匹夫何傷辭殫意窮心切理直如
或妄談昊天是殛子野善聽離婁至明神靡遁響鬼
無逃形不我遐棄庶昭忠誠

贈參寥子

白鶴飛天書南荆訪高士五雲在峴山果得參寥子
翫麟辭故園昂藏入君門天子分玉帛百官接話言
毫墨時灑落探元有奇作著論窮天人千春祕麟閣
長揖不受官拂衣歸林巒余亦去金馬藤蘿同所歡
相思在何處桂樹青雲端

贈饒陽張司戶璪

燕魏太原

朝飲蒼梧泉夕棲碧海煙寧知鸞鳳意遠託椅桐前
慕蘭豈曩古攀嵒是當年愧非黃石老安識子房賢
功業嗟落日容華棄徂川一語已道意三山期著鞭
蹠蹠人間世寥落壺中天獨見遊物祖探元窮化先
何當共攜手相與排冥一作冥筌

贈清漳明府姪

我李百萬葉柯條布中州天開青雲器曰為蒼生憂
小邑且割雞大刀佇烹牛雷聲動四境惠與清漳流
絃歌詠唐堯脫落隱簪組心和得天真風俗由一作由獨太
古牛羊散阡陌夜寢不扃戶問此何以然賢人宰吾
土舉邑樹桃李垂陰亦流芬河堤繞綠水桑柘連青

雲趙女不治容提籠畫成羣縹絲鳴機杼百里聲相
聞訟息鳥下階高卧披道帙蒲鞭挂簷枝示恥無撲
扶琴清月當戶人寂風入室長嘯無一言陶然上皇
逸白玉壺冰水壺中見底清清光洞毫髮皎潔照羣
情趙北美佳政燕南播高名過客覽行謠因之頌德
聲一作得
頌聲

贈臨洺縣令皓弟

時被訟
停官

陶令去彭澤茫然元古心大音自成曲但奏無弦琴
釣水路非遠連鰲意何深終期龍伯國與余相招尋
贈郭季鷹

河東郭有道於世若浮雲盛德無我位清光獨映君

恥將雞並食長與鳳為羣一擊九千仞相期凌紫氛

鄴中贈王大勸入高鳳石門山幽居

一身竟無託遠與孤蓬征千里失所依復將落葉并
中途偶良朋問我將何行欲獻濟時策此心誰見明
君王制六合海塞無交兵壯士伏草間沉憂亂縱橫
飄飄不得意昨發南都城紫鸞櫪上嘶青萍匣中鳴
投軀寄天下長嘯尋豪英恥學琅邪人龍蟠事躬耕
富貴吾自取建功及春榮我願執手爾方達我情
相知同一已豈唯弟與兄抱子弄白雲琴歌發清聲
臨別意難盡各希存令名

贈華州王司士陝西

淮水不絕波瀾高盛德未泯生英髦知君先負廟堂
器今日還須贈寶刀

贈盧徵君昆弟

明王訪賢逸雲泉今已空二盧竟不起萬乘高其風
河上喜相得壺中趣每同滄洲即此地觀化遊無窮
木落海水清鰲背覩方蓬與君弄倒影攜手凌星虹

贈新平一作豐少年

韓信在淮陰少年相欺凌屈體若無骨壯心有所憑
一遭龍顏君嘯吒從此興千金荅漂母萬古共嗟稱
而我竟胡一作何為寒苦坐相仍長風入短袂內一作兩手如
懷冰故友不相恤新交寧見矜摧殘檻中虎羈紲一作鞵

上鷹何時騰風雲搏擊申所能

贈崔侍御

長劍一杯酒男兒方寸心洛陽因劇孟託一作訪宿詰曾
襟但仰山嶽秀不知江海深長安復攜手再顧重千
金君乃輶軒佐余叨翰墨林高風摧秀木驚彈落虛
禽不取回舟興而來命駕尋扶搖應借便一作力桃李願
成陰笑吐張儀舌愁為莊舄吟誰憐明月夜腸斷聽
秋砧

走筆贈獨孤駙馬

都尉朝天躍馬歸香風吹人花亂飛銀鞍紫鞵照雲
日左顧右眄生光輝是時僕在金門裏待詔公車謁

天子長揖蒙垂國士恩壯心剖出酬知己一別蹉跎
朝市間青雲之交不可攀儻其公子重迴顧何必侯
嬴長抱關

李太白文集卷第八

吳門繆晁武子甫重刊宋本

李太白文集卷第九

歌詩三十四首

贈二

贈嵩山焦鍊師 并序洛陽

嵩丘有神人焦鍊師者不知何許婦人也又云生於齊梁時其年貌可稱五六十常胎息絕穀居少室廬遊行若飛倏忽萬里世或傳其入東海登蓬萊竟不能測其往也余訪道少室盡登三十六峯聞風有寄灑翰遙贈

二室凌

一作倚

青天三花含

一作明

紫

一作綠

煙中有蓬海客宛疑

麻姑仙道在喧莫染跡高想已緜時餐金我

一作金

屢讀青苔篇八極恣遊憩九垓長周旋下瓢酌潁水
舞鶴來伊川還歸空山上獨拂秋霞眠蘿月挂朝鏡
松風鳴夜絃潛光隱嵩嶽鍊魄棲雲幄霓衣何飄飄
一作鳳吹轉絲邈願同西王母下顧東方朔紫書儻
可傳真一作銘骨誓相學

口號贈陽徵君

此公時被徵

陶令辭彭澤梁鴻入會稽我尋高士傳君與古人齊
雲卧留丹壑天書降紫泥不知楊伯起早晚向關西

秋日鍊藥院鑷白髮贈元六兄林宗

木落識歲秋瓶水知天寒桂枝日已綠拂雪凌雲端
弱齡接光景矯翼攀鴻鸞投分三十載榮枯同所懽

長吁望青雲鑷白坐相看秋顏入曉鏡壯髮凋危冠
窮與鮑生賈飢從漂母食時來極天人道在豈吟歎
樂毅方適趙蘇秦初說韓卷舒固在我何事空摧殘

書情贈蔡舍人雄

梁宋

嘗高謝太傅

一作嘗聞謝安石

攜妓東山門楚舞醉碧雲吳歌

斷清媛慙因蒼生起談笑安黎元余亦愛此人丹霄
冀飛翻遭逢聖明主敢進興亡言娥眉積讒妬魚目
嗤璵璠白璧竟何辜一作本無瑕青蠅遂成寃一朝去京國
十載客梁園猛犬吠九關殺人憤精魂皇穹雪天枉
白日開氛昏太階得夔龍桃李滿中原倒海索明月
凌山採芳蓀愧無橫草功虛負雨露恩跡謝雲臺閣

心隨天馬轅夫子王佐才而今復誰論曾飄振六翮
不日思騰騫我縱五湖棹煙濤恣崩奔夢釣子陵湍
英氛緬猶存徒希客星隱弱植不足援千里一迴首
萬里一長歌黃鶴不復來清風奈愁何舟浮瀟湘月
一作江橫山倒洞庭波投汨笑古人臨濠得天和閑時
羅剎石田畝中搔背牧雞鵝別離解相訪應在武陵多

憶襄陽舊遊贈濟陰馬少府巨

昔爲大堤客曾上山公樓開窻碧嶂滿拂鏡滄江流
高冠佩雄劔長揖韓荆州此地別夫子今來思舊遊
朱顏君未老白髮我先秋壯志恐蹉跎功名若雲浮
一作有意未得言懷賢若沉憂歸心結遠夢落日懸春愁空思羊叔子

墮淚峴山頭

一作何時共攜
手更醉峴山頭

對雪獻從兄虞城宰

昨夜梁園雪弟寒兄不知庭前看玉樹腸斷憶連枝
訪道安陵遇蓋寰爲子造真錄臨別留贈

清水見白石仙人識青童安陵蓋夫子十歲與天通
懸河與微言談論安可窮能令二千石撫背驚神聰
揮毫贈新詩高價掩山東至今平原客感激慕清風
學道北海仙傳書藥珠宮丹田了玉闕白日思雲空
爲我草真錄天人慙妙工七元洞豁落八角輝星虹
三災蕩璇璣蛟龍翼微躬舉手謝天地虛無齊始終
黃金獻高堂荅荷難克充下笑世上事沉魂北羅豐

昔日萬乘墳今成一科蓬贈言若可重實此輕華萬

雜言用投丹陽知已兼奉宣慰判官

客從崑崙來遺我雙玉璞云是古之得道者西王母
食之餘食之可以凌太虛愛之頗謂絕今昔求識江
淮人猶乎比石如今雖在下和手

正憔悴了了

知之亦何益恭聞士有調相如始從鎬京還復欲鎬
京去能上秦王殿何時迴光一相眄欲投君保君年
幸君持取無棄捐無棄捐服之與君俱神仙

贈崔郎中宗之 金陵

胡鷹

一作鷹拂海翼翱翔鳴素秋驚雲辭沙朔飄蕩迷河

洲 一作胡鷹度日邊兩龍天地有一作如飛蓬人去逐

萬里遊登高望浮雲騁騁如舊丘日從海旁沒水向
天邊流長嘯倚孤劍目極心悠悠歲晏歸去來富貴
安所求仲尼七十說歷聘莫見收魯連逃千金珪組
豈可一作不足酬時哉苟不會草木為我儔希君同攜手長
往南山幽

贈崔諮議

駮驥

本天馬素非伏櫪駒長嘶向一作起清風倏忽凌九

區何言西北至却是東南隅世道有翻覆前期一作程
難預圖希君一作前剪拂一作佛便猶可騁中衢

贈昇州王使君忠臣

六代帝王國三吳佳麗城賢人當重寄天子借高名

巨海一邊靜長江萬里清應須救趙策未肯棄侯嬴

贈別從甥高五

魚目高太山不如一瑱璫賢甥即明月聲價動天門
能成吾宅相不減魏陽元自顧寡籌略功名安所存
五木思一擲如繩繫窮猿櫪中駿馬空堂上醉人喧
黃金久已罄為報故交恩聞君隴西行使我驚魂魄
與爾共飄颻雪天各飛翻江水流或卷此心難具論
貧家羞好客語拙覺辭繁三朝空錯莫對飯却慙寬
自笑我非夫生事多契闊蓄積萬古憤向誰得開豁
天地一浮雲此身乃毫末忽見無端倪太虛可苞括
去去何足道臨岐空復愁肝膽不楚越山河亦衾幃

雲龍若相從明主會見收成功解相訪溪水桃花流

贈裴司馬

翡翠黃金縷繡成歌舞衣若無雲間月誰可比光輝
秀色一如此多為衆女譏君恩移昔愛失寵秋風歸
愁苦不窺鄰泣上流黃機天寒素手冷夜長燭復微
十日不滿匹鬢蓬亂若絲猶是可憐人容華世中稀
向君發皓齒顧我莫相違

敘舊贈江陽宰陸調

太伯讓天下仲雍揚波濤清風蕩萬古跡與星辰高
開吳食東溟陸氏世英髦多君秉古節嶽立冠人曹
風流少年時京洛事遊遨晉間延陵劍玉帶明珠袍

我昔鬪雞徒連延五陵豪邀遮相組織呵嚇來煎熬
君開萬叢人鞍馬皆闢易告急清憲臺脫余北門厄
間宰江陽邑剪棘樹蘭芳一本自陸氏世英髦以下
曹風流少年時京洛事遊遨驂驛紅陽驚玉劍明珠
袍一諾許他人千金雙錯刀滿堂青雲士望美期丹
霄邀我昔北門厄推如一枝蒿虎挾雞徒連延五陵
豪此邀遮來組織可嚇相煎熬君披萬人叢脫我如貌
宰蒼蓬老壯駿長策未逢遭別君幾何時君無相思
否鳴琴坐高樓綠水淨窻牖政成聞雅頌人吏皆拱
手投刃有餘地迴車攝江陽錯雜非易理先威淫豪
此強下與城門何蕭穆五月飛秋霜好鳥集珍木高才
列華堂時從府中歸絲管儼成行但苦隔遠道無由
共銜觴江北荷花開江南楊梅熟正好飲酒時懷賢
在心目挂席候海色當風下長川多酷新豐醪滿載

剡溪船中途不遇人直到爾門前大笑同一醉取樂
平生年

贈從孫義興宰銘

丞相李公重之以能政
中丞李公免罷以移官

天子思茂宰天枝得英才
朗然清秋月獨出映吳臺
落筆生綺繡操刀振風雷
夔屈雖百里鵬騫望三台
退食無外事琴堂向山開
綠水寂以閑白雲有時來
河陽富竒藻彭澤縱名杯
所恨不見之猶如仰昭回
元惡昔滔天疲人散幽草
鷲川無恬鱗舉邑罕遺老
誓雪會稽恥將奔宛陵道
亞相素所重投刃應桑林
獨坐傷傲揚神融一開襟
絃歌欣再理和樂醉人心
蠹政除害馬傾巢有歸禽
壺漿候君來聚舞共謳吟

農夫棄蓑笠蠶女墮纓簪歡笑相拜賀則知惠愛深
歷職吾所聞稱賢爾爲最化洽一邦上名馳三江外
峻節冠雲霄通方堪遠大能文變風俗好客留軒蓋
他日一來遊因之嚴光瀨

草創大還贈柳官迪

天地爲橐籥周流行太易造化合元符交構騰精魄
自然成妙用孰知其指的羅絡四季間絲微一無隙
日月更出沒雙光豈云隻姤女乘河車黃金充轆轤
執樞相管轄摧伏傷羽翮朱鳥張炎威白虎守本宅
相煎成苦老消爍凝津液髮髣髴明惚塵死灰同至寂
鑄冶入赤色十二周律曆赫然稱大還與道本無隔

贈崔司戶文昆季

白日可撫弄清都在咫尺北豐落死名南斗上生籍
抑予是何者身在方士格才術信縱橫世途自輕擲
吾求仙棄俗君曉損勝益不向金闕遊思爲玉皇客
鸞車速風電龍騎無鞭策一舉上九天相攜同所適
雙珠出海底俱是連城珍明月兩特達餘輝照傍人
英聲振名都高價動殊鄰豈伊箕山故特以風期親
惟昔不自媒擔簦西入秦攀龍九天上別忝歲星臣
布衣侍丹墀密勿草絲綸才微惠渥重讒巧生緇磷
一去已十年今來復盈旬清霜入曉鬢白露生衣巾
側見綠水亭開門列華茵千金散義士四座無凡賓

欲折月中桂持爲寒者薪路傍已竊笑天路將何因
垂恩儻丘山報德有微身

贈溧陽宋少府陟

李斯未相秦且逐東門兔宋玉事襄王能爲高唐賦
常聞綠水曲忽此相逢遇掃灑青天開豁然披雲霧
威蕤紫鸞鳥巢在崑山樹鷲風西北吹飛落南溟去
早懷經濟策特受龍顏顧白玉棲青蠅君臣忽行路
人生感分義貴欲呈丹素何日清中原相期廓天步

戲贈鄭溧陽

陶令日日醉不知五柳春素琴本無絃漉酒用葛巾
清風北牕下自謂羲皇人何時到溧一作栗里一見平生親

贈僧崖公

昔在卽陵東學禪白眉空大地了鏡徹迴旋寄輪風
攬彼造化力持爲我神通晚謁太山君親見日沒雲
中夜卧山月一作夜卧拂衣逃人羣授余金仙道曠劫
未始聞冥機發天光獨卽謝垢氛虛舟不繫物觀化
遊江濱江濱遇同聲道崖乃僧英說法動海嶽遊方
化公卿手秉玉麈尾如登白樓亭微言注百川疊疊
信可聽一風鼓羣有萬籟各自鳴啓開七牕牖託宿
掣雷霆自云歷天台搏壁躡翠屏凌兢石橋去恍惚
入青冥昔往今來歸絕景無不經何日更攜手乘杯
向蓬瀛

遊溧陽北湖亭望瓦屋山懷古贈同旅一作贈孟浩然

朝登北湖亭遙望瓦屋山天清白露下始覺一作知秋風
還遊子託主人仰觀眉睫間日一作色送飛鴻邈然不
可攀長吁相勸勉何事來吳關聞有貞義女振窮漂
水灣清光了在眼白日如披顏高墳五六墩萃兀栖
猛虎遺跡翳九泉芳名動千古子胥昔乞食此女傾
壺漿運開展宿憤入楚鞭平王凜冽天地間聞名若
懷霜壯夫或未達十步九太行與君拂衣去萬里同
翱翔

醉後贈從甥高鎮

馬上相逢揖馬鞭客中相見客中憐欲邀擊筑悲歌飲

正值傾家無酒錢江東風光不借人枉殺落花空自
春黃金逐手快意盡昨日破產今朝貧丈夫何事空
嘯傲不如燒却頭上巾君爲進士不得進我被秋霜
生旅鬢時清不及英豪人三尺童兒唾廉蔭匣中盤
却裝鰈魚閑在罾間未用渠且將換酒與君醉醉歸
記宿吳鱖諸

贈秋浦柳少府

秋浦舊蕭索公庭人吏稀因君樹桃李此地忽芳菲
搖筆望白雲開簾當翠微時來引山月縱酒酣清輝
而我愛夫子淹留未忍歸

贈崔秋浦三首

李九

吾愛崔秋浦宛然陶令風門前一作栽五楊柳井上一作二
梧桐山鳥下聽事簷花落酒中懷君未忍去惆悵意
無窮

崔令學陶令

一作君似陶彭澤

北牕常晝眠抱琴時弄月

一作待秋月

取意在無絃見客但傾酒為官不愛錢東臯多種黍

勸爾早耕田一作東臯春事起種黍早歸田

河陽花作縣秋浦玉為人地逐名賢好風隨惠化春
水從天漢落山逼畫屏新應念金門客投沙弔楚臣

望九華山贈韋青陽仲堪

昔在九江上遙望一作觀九華峯天河挂綠水秀出一作九
芙蓉我欲一揮手誰人可相從君為東道主於此卧

雲松

贈柳圓

竹實滿秋浦鳳來何苦飢還同月下鵲三繞未安枝
夫子即瓊樹傾柯拂羽儀懷君戀明德歸去日相思
聞謝楊兒吟猛虎詞因有此贈

同州隔秋浦聞吟猛虎詞晨朝來借問知是謝楊兒
宿清溪主人

夜到清溪宿主人碧巖裏簷楹挂星斗枕席響風水
月落西山時啾啾夜猿起

贈王判官時余歸隱居廬山屏風疊

尋陽

昔別黃鶴樓蹉跎淮海秋俱飄零落葉各散洞庭流

中年不相見，蹭蹬遊吳越。何處我思君，天台綠蘿月。
會稽風月好，却遶剡溪迴。雲山海上出，人物鏡中來。
一度浙江北，十年醉楚臺。荆門倒屈宋，梁苑傾鄒枚。
善笑我誇誕，知音安在哉。大盜割鴻溝，如風掃秋葉。
吾非濟代人，且隱屏風疊。中夜天中望，憶君思見君。
明朝拂衣去，永與海鷗羣。

在水軍宴贈幕府諸侍御

永王軍中

月化五白一作百龍，翻飛凌九天。胡沙驚北海，電掃洛陽川。
虜箭雨宮闕，皇輿成播遷。英王受廟略，秉鉞清南邊。
雲旗卷海雪，金戟羅江煙。聚散百萬衆，施張在一賢。
霜臺降羣彥，水國奉戎旃。繡服開宴語，天人借樓

船。如登黃金臺，遙謁紫霞仙。卷身編蓬下，冥機四十年。
寧知草間人，畧下有龍泉。浮雲在一決，誓欲清幽燕。
願與四座公，靜談金匱篇。齊心戴朝恩，不惜微軀捐。
所冀旄頭滅，功成追魯連。

贈潘侍御論錢少陽

繡衣柱史何昂藏，鐵冠白筆橫。秋霜三軍論，事多引
納堦前虎士羅。干將雖無二十五，老者且有一翁錢。
少陽眉如松雪齊，四皓調笑可以安。儲皇君能禮此
最下士，九州拭目瞻清光。

贈武十七諤

并序

門人武諤深於義一作詩者也。質木沉悍，慕要離之風，潛

釣川海不數數於世間事聞中原作難西來訪余余
愛子伯禽在魯許將冒胡兵以致之酒酣感激援筆
而贈

馬如一匹練明日過吳門乃是要離客西來欲報恩
笑開燕匕首拂拭竟無言狄犬吠清洛天津成塞垣
愛子隔東魯空悲斷腸援林回棄白璧千里阻同奔
君為我致之輕賈涉淮源精誠合天道不愧遠遊竟
一作鄧攸竟

李太白文集卷第九

吳門繆曷武子甫重刊宋本

李太白文集卷第十

歌詩二十九首

贈三

贈張相鎬二首

時逃難病在宿松山作後一首亦作書懷重寄張相公

神器難竊弄天狼窺紫宸六龍遷一作駕白日四海一作九洛暗

胡塵昊穹降元宰君子方經綸澹然養浩氣歛起持

天鈞秀骨象山嶽英謀合鬼神佐漢解鴻門興唐一作功

思退身一作生唐為後身擁旌秉金鉞伐鼓乘失輪一作功將如雷

電一作電摠戎向東巡諸侯拜馬首猛士騎鯨鱗澤被魚

鳥悅令行草木春聖智一作逢聖不失時建功及良辰醜虜

安足紀可貽悵與中倒瀉溟海珠盡為入幕珍馮異

獻赤伏鄧生歛來臻庶同昆陽舉再覩漢儀新昔為
管將鮑中奔吳隔秦一生欲報主百代期榮親其事
竟不就哀哉難重陳卧病古松滋蒼山空四鄰風雲
激壯志枯槁驚常倫聞君自天來目張氣益振亞夫
得劇孟敵一作七國空一作定無人捫蝨對相公願得論悲辛

大塊方噫氣何辭鼓青蘋斯言儻不合歸老漢江濱

本家一作家本隴西人先為漢邊將功略蓋天地名飛青雲

上苦戰竟不侯當年頗惆悵世傳崆峒勇氣激金風

壯英烈遺厥孫伯代神猶王十五觀奇書作賦凌相

如龍顏惠殊寵麟閣憑天居一作侍從承明廬晚途未云已蹭

蹬遭讒毀想像晉末時崩騰胡塵起衣冠陷鋒鏑戎

虜盈朝市一作荆棘生朝市石勒窺神州劉聰劫天子撫劍夜

吟嘯雄心日千里誓欲斬鯨鯢澄清洛陽水六合一作三合

灑霖雨萬物一作六合無凋枯我揮一杯水自笑何驅驅因

人恥成事貴欲決良圖滅虜不言功飄然陟一作向蓬壺

唯有安期舄留之滄海隅

贈閻丘宿松

阮籍為太守乘驢上東平剖竹十日間一朝風化清
偶來拂衣去誰測主人情夫子理宿松浮雲知古城
掃地物莽然秋來百草生飛鳥還舊巢遷人返躬耕
何慙宓子賤不減陶淵明吾知千載後却掩二賢名

獄中上崔相渙尋陽

胡馬渡洛水血流征戰場千門閉秋景萬姓危朝霜
賢相燮元氣再欣海縣康台庭有夔龍列宿粲成行
羽翼三元聖發輝兩太陽應念覆盆下雪泣拜天光
繫尋陽上崔相渙三首

邯鄲四十萬同日陷長平能迴造化筆或冀一人生
毛遂不墮井曾參寧一作不殺人虛言誤公子投杼惑慈
親白璧雙明月方知一玉真

虛傳一片雨枉作陽臺神縱爲夢裏相隨去不是襄
王傾國人此一首恐非上崔相

中丞宋公以吳兵三千赴河南軍次尋陽脫
余之囚參謀幕府因贈之

獨坐清天下專征出海隅九江皆渡虎三郡盡還珠
組練明秋浦樓船入郢都風高初選將月滿欲平胡
殺氣橫千里軍聲動九區白猿慙劍術黃石借兵符
戎虜行當剪鯨鯢立可誅自憐非劇孟何以佐良圖

流夜郎贈辛判官 流夜郎

昔在長安醉花柳五侯七貴同杯酒氣岸遙凌豪士
前風流肯落他一作誰人後夫子紅顏我少年章臺走
馬著金鞭文章獻納麒麟殿歌舞淹留玳瑁筵與君
自謂長如此寧知草動風塵起函谷忽驚胡馬來秦
宮桃李向胡開我愁遠謫夜郎去何日金雞放赦迴

贈劉都使

東平劉公幹南國秀餘芳一鳴即朱紱五十佩銀章
飲冰事戎幕衣錦華水鄉銅官幾萬人諍訟清玉堂
吐言貴珠玉落筆迴風霜而我謝明主銜哀投夜郎
歸家酒債多門客粲成行高談滿四座一日傾千觴
所求竟無緒裘馬欲摧藏主人若不顧明發鈞滄浪

贈常侍御

安石在東山無心濟天下一起振橫流功成復蕭灑
大賢有舒卷季葉輕風雅匡復屬何人君為知音者
傳聞武安將氣振長平瓦燕趙期洗清周秦保宗社
登朝若有言為訪南遷賈

贈易秀才

少年解長劍投贈即分離何不斷犀象精光暗往時
蹉跎君自惜竄逐我因誰地遠虞翻老秋深宋玉悲
空摧芳桂色不屈古松姿感激平生意勞歌寄此辭

經亂離後天恩流夜郎憶舊遊書懷贈江夏
韋太守良宰

江夏岳陽

天上白玉京十二樓五城仙人撫我頂結髮受長生
誤逐世間樂頗窮理亂情九十六聖君浮雲挂空名
天地賭一擲未能忘戰爭試涉霸王略將期軒冕榮
時命乃大謬棄之海上行學劍翻自哂為文竟何成
劍非萬人敵文竊四海聲兒戲不足道五噫出西京
臨當欲去時慷慨淚沾纓歎君個儻才標舉冠羣英

開筵引祖帳慰此遠徂征鞍馬若浮雲送余驃騎亭
歌鍾不盡意白日落昆明十月到幽州戈鋌若羅星
君王棄北海掃地借長鯨呼吸走百川燕然可摧傾
心知不得意一作語却欲棲蓬瀛彎弧懼天狼挾矢不敢
張攬涕黃金臺呼天哭昭王無人貴駿骨綠耳空騰
驤樂毅儻再生今亦奔亡蹉跎一作蒼忙不得意驅馬過
貴鄉逢君聽絃歌肅穆坐華堂百里獨太古陶然卧
羲皇徵樂昌樂館開筵列壺觴賢豪間青娥對燭儼
成行醉舞紛綺席清歌繞飛梁歡娛未終朝秩滿一作解印
歸咸陽祖道擁萬人供帳遙相望一別隔千里榮枯
異炎涼炎涼幾度改九土中橫潰漢甲連胡兵沙塵

暗雲海草木搖殺氣星辰無光彩白骨成丘山蒼生
竟何罪函關壯帝居國命懸哥舒長戟三十萬開門
納兇渠公卿奴犬羊忠讜醢與菹二聖出遊豫兩京
遂丘墟帝子許專征秉旄控強楚節制非桓文軍師
擁熊虎人心失去就賊勢騰風雨惟君固房陵誠節
冠終古僕臥香鑪頂食霞漱瑤泉門開九江轉枕下
五湖連半夜水軍來尋陽滿旌旄空名適自誤迫脅
上樓船徒賜五百金棄之若浮煙辭官不受賞翻謫
夜郎天夜郎萬里道西上令入老掃蕩六合清仍為
負霜草日月無偏照何由訴蒼昊良牧稱神明深仁
恤交道一忝青雲客三登黃鶴樓顧慙彌處士虛對

鸚鵡洲焚一作山霸氣盡寥落天地秋一作形體冠白江

帶峨眉雪橫穿三峽流萬舸此中來連帆過揚州送

此萬里目曠然散我一作愁紗牕倚天開水樹綠如髮

一作水綠窺日一作畏銜山促酒喜見月吳娃與越豔窈

窕誇鈿紅呼來上雲梯含笑出簾櫳對客小垂手羅

衣舞春風賓跪請休息主人情未極覽君荆山作江

鮑堪動色清水出芙蓉天然去雕飾逸興橫素襟無

時不招尋朱門一作擁虎士列戟何森森剪鑿竹石開

縈流漲清深登樓一作坐一作水閣吐論多英一作音片辭

貴白壁一諾輕黃金謂我不媿君青鳥一作明丹心五

色雲間鵲飛鳴天上來傳聞赦書至却放夜郎迴暖

氣變寒谷炎煙生死灰君登鳳池去勿棄賈生才桀

犬尚吠堯匈奴笑千秋中夜四五歎常為大國憂旌

旆夾兩山黃河當中流連雞不得進飲馬空夷猶安

得羿善射一箭落旄頭

江夏使君叔席上贈史郎中

鳳凰丹禁裏銜出紫泥書昔放三湘去今還萬死餘

仙郎久為別客舍問何如涸轍思流水浮雲失舊居

多慙華省貴不以逐臣踈復如竹林下而陪芳宴初

希君生羽翼一化北溟魚

流夜郎半道承恩放還兼欣剋復之美書懷

示息秀才

黃口爲人羅白龍乃魚服得罪豈怨天以愚陷網目
鯨鯢未剪滅豺狼屢翻覆悲作楚地囚何由秦庭哭
遭逢二明主前後兩遷逐去國愁夜郎投身竄荒谷
半道雪屯蒙曠如鳥出籠遙欣剋復美光武安可同
天子巡劔閣儲皇守扶風揚袂正北辰開襟攬羣雄
胡兵出月窟雷破關之東左掃因右拂旋收洛陽宮
迴輿入咸京席卷六合通叱咤開帝業一作手成天地
功大駕還長安兩日忽再中一朝讓寶位劔璽傳無
窮媿無秋毫力誰念矍鑠翁弋者何所慕高飛仰冥
鴻棄劔學丹砂臨鑪雙玉童寄言息夫子歲晚陟方
蓬

巴陵贈賈舍人

賈生西望憶京華湘浦南遷莫怨嗟聖主恩深漢文
帝憐君不遣到長沙

博平鄭太守自廬山千里相尋入江夏北市

門見訪却之武陵立馬贈別

大梁貴公子氣蓋蒼梧雲若無三千客誰道信陵君
救趙復存魏英威天下聞邯鄲能屈節訪博從毛薛
夷門得隱淪而與侯生親仍要鼓刀者乃是袖鎚人
好士不盡心何能保其身多君重然諾意氣遙相託
五馬入市門金鞍照城郭都忘虎竹貴且與荷衣樂
去去桃花源何時見歸軒相思無終極腸斷卽江作

陵後

江上贈竇長史

漢求季布魯朱家楚逐伍胥去章華萬里南遷夜郎
國三年歸及長風沙聞道青雲貴公子錦帆遊弈西
江水人疑天上坐樓船水淨霞明兩重綺相約相期
何太深棹歌搖艇月中尋不同珠履三千客別欲論
交一片心

贈王漢陽

天落白玉棺一作天上王喬辭葉縣一去未十年漢陽
復相見猶乘飛鳧鳥尚識仙人面鬢髮何青青童顏
皎如練吾曾弄海水清淺嗟三變果愜麻姑言時光
速流電與君數杯酒可以窮歡宴白雲歸去來何事
坐交戰

贈漢陽輔錄事二首

聞君罷官意我抱漢川湄借問久踈索何如聽訟時
天清江月白心靜海鷗知應念投沙客空餘弔屈悲
鸚鵡洲橫漢陽渡水引寒煙沒江樹南浦登樓不見
君君今罷官在何處漢口雙魚白錦鱗令傳尺素報
情人其中字數無多少祇是相思秋復春

江夏贈韋南陵冰

胡驕馬蘄沙塵起胡騶飲馬天津水君為張掖近酒
泉我竄三巴九千里天地再新法令寬夜郎遷客帶

霜寒西憶故人不可見東風吹夢到長安寧期此地
忽相遇驚喜茫如墮煙霧玉簫金管喧四筵苦心不
得申一作長句昨日繡衣傾綠樽病如桃李竟何言昔
騎天子大宛馬今乘欵段諸侯門賴遇南平豁方寸
復兼夫子持清論有似山開萬里雲四望青天解人
悶人悶還心悶苦辛長苦辛愁來飲酒二千石寒灰
重暖生陽春山公醉後能騎馬別是風流賢主人頭
陀雲月多僧氣山水何曾稱人意不然一作能鳴笳按鼓
戲滄流呼取江南女兒歌棹謳我且為君槌碎黃鶴
樓君亦為吾倒却鸚鵡洲赤壁爭雄如夢裏且須歌
舞寬離憂

贈別舍人弟臺卿之江南

去國客行遠還山秋夢長梧桐落金井一葉飛銀牀
覺罷把朝鏡鬢毛颯已霜良圖委蔓草古貌成枯桑
欲道心下事時人疑夜光因為洞庭葉飄落之瀟湘
一作流浪令弟經濟士一作謫居我何傷一作出門潜虬隱
尺斗一作水著論談興亡立遇王子喬口傳不死方入洞
過天地登真朝玉皇吾將撫爾背揮手遂翱翔一作攜手
凌蒼蒼

贈盧司戶

秋色無遠近出門盡寒山白雲遙相識待我蒼梧間
借問盧耽鶴西飛幾歲還

贈從弟南平太守之遙二首

時因飲酒過度
陵後詩故贈

少年不作意落拓無安居願隨任公子欲釣吞舟魚
常時飲酒逐風景壯心遂與功名踈蘭生谷底人不
鋤雲在高山空卷舒漢家天子馳駟馬赤車蜀道迎
相如天門九重謁聖人龍顏一解四海春彤庭左右
呼萬歲拜賀明主收沉淪翰林秉筆迴英眄麟閣崢
嶸誰可見承恩初入銀臺門一作承恩侍從甘泉宮著書獨在金
鑾殿龍駒雕鏗白玉鞍象牀綺食一作席黃金盤當時笑
我微賤者却來請謁為交歡一朝謝病遊江海疇昔
相知幾人在前門長揖後門關今日結交明日改愛
君山嶽心不移隨君雲霧迷所為夢得池塘生春草
使我長價登樓詩別後遙傳臨海作可見羊何共和之

東平與南平今古兩步兵素心愛美酒不是顧專城
謫官桃源去尋花幾處行秦人如舊識出戶笑相迎

醉後贈王歷陽 歷陽

書禿千兔毫詩裁兩牛鬐筆蹤起龍虎舞袖拂雲霄
雙歌一作寄二胡姬更奏一作唱遠清朝舉酒挑朝雪從君不
相饒

贈歷陽褚司馬時此公為稚子舞

北堂千萬壽侍奉有光輝先同稚子舞更著老萊衣
因為小兒啼醉倒月下歸人間無此樂此樂世中希
對雪醉後贈王歷陽

有身莫犯飛龍鱗有手莫辯猛虎鬚君看昔日汝南

市白頭仙人隱玉壺子猷聞風動
臆竹相邀共醉杯中淥歷陽何異山陰時
白雪飛花亂人目君家有酒我何愁
客多樂酣秉燭遊謝尚自能鸚鵡舞
相如免脫鷓鴣裘一作鼓棹清晨興罷過江去他日西看却月樓一作千里相思明月樓

李太白文集卷第十

吳門繆晁武子甫重刊宋本

李太白文集卷第十一

歌詩三十二首

贈四

贈宣城宇文太守兼呈崔侍御

宣城

白若白鷺鮮清如清唳蟬受氣有本性不爲外物遷
飲水箕山上食雪首陽巔迴車避朝歌掩口去盜泉
岩堯廣成子倜儻魯仲連卓絕二公外丹心無間然
昔攀六龍飛今作百鍊鈇懷恩欲報主投佩向北燕
彎弓綠弦開滿月不憚堅閑騎駿馬獵一射兩虎穿
回旋若流光轉背落雙鳧胡虜三歎息兼知五兵權
鎗鎗突雲將却掩我之妍多逢勦絕兒先著祖生鞭

李十一
據鞍空矍鑠壯志竟誰宣蹉跎復來歸憂恨坐相煎
無風難破浪失計長江邊危苦惜頽光金波忽三圓
時遊敬亭上閑聽松風眠或弄宛溪月虛舟信洄泂
顏公三十萬盡付酒家錢興發每取之聊向醉中仙
過此無一事靜談秋水篇君從九卿來水國有豐年
魚鹽滿市井布帛如雲煙下馬不作威冰壺照清川
霜眉邑中叟皆美太守賢時時慰風俗往往出東田
竹馬數小兒拜迎白鹿前含笑問使君日一作晚可迴
旋一作還遂歸池上酌掩抑清風絃曾標橫浮雲一作將下
撫謝朓肩樓高碧海出樹古青蘿懸光祿紫霞杯伊
昔忝相傳良圖掃沙漠別夢繞旌旄富貴日成疎願

一言杳無緣登龍有直道倚玉阻芳筵敢獻繞朝策思
同郭泰船何言一水淺似隔九重天崔生何傲岸縱
酒復談玄身為名公子英才苦屯遭鳴鳳託高梧凌
風何翩翩安知慕羣客彈劔拂秋一作青蓮

贈宣城趙太守悅

趙得寶符盛山河功業存三千堂上客出入擁平原
六國揚清風英聲何喧喧大賢茂遠業虎竹光南藩
錯落千丈松虬龍盤古根枝下無俗草所植唯蘭蓀
憶在南陽時始承國士恩公爲柱下史脫繡歸田園
伊昔簪白筆幽都逐遊魂持斧佐三軍霜清天北門
差池宰兩邑鶚立重飛翻焚香入蘭臺起草多芳言

夔龍一顧重矯翼凌翔鷁赤縣揚雷聲強項聞至尊
驚飈摧秀木跡屈道彌敦出牧歷三郡所居猛獸奔
遷人同衛鶴謬上懿公軒自笑東郭履側慙狐白溫
閑吟步竹石精義忘朝昏顛顛成醜士風雲何足論
獼猴騎士牛羸馬夾雙轅願借羲和景為人照覆盆
溟海不震蕩何由縱鵬鯢所期要津日倜儻假騰騫

贈從弟宣州長史昭

淮南一作北望江南千里碧山對我行倦一作盡過之半落青
天外宗英佐雄郡水陸相控帶長川豁中流千里瀉
吳會君心亦如此包納無小大搖筆起風霜推誠結
仁愛訟庭垂桃李賓館羅軒蓋何意蒼梧雲飄然忽

相會才將聖不偶命與時俱背獨立山海間空老聖
明代知音不易得撫劔增感慙當結九萬期中途莫
先退

書懷贈南陵常贊府

歲星入漢年方朔見明主調笑當時人中天謝雲雨
一去麒麟閣遂將朝市乖故交不過門秋草日上階
當時何特達獨與我心諧置酒凌敲臺歡娛未曾貶
歌動白紵山舞迴天門月問我心中事為君前致辭
君看我才能何似魯仲尼大聖猶不遇小儒安足悲
雲南五月中頻喪渡瀘師毒草殺漢馬張兵奪秦旗
至今西二河流血擁僵屍將無七擒略魯女惜園葵

咸陽天地樞累歲人不足雖有數斗玉不如一盤粟
賴得契宰衡持鈞慰風俗自顧無所用辭家方未歸
霜驚壯士髮淚滿逐臣衣以此不安席蹉跎身世違
終當滅衛謗不受魯人譏

於五松山贈南陵常贊府

為草當作蘭為木當作松蘭秋香風遠松寒不改容
松蘭相因依蕭艾徒丰茸雞與雞並食鸞與鸞同枝
揀珠去沙礫但有珠相隨遠客投名賢真堪寫懷抱
若惜方寸心待誰可傾倒虞卿棄趙相便與魏齊行
海上五百人同日死田橫當時不好賢豈傳千古名
願君同心人於我少留情寂寂還寂寂出門迷所適

長劍歸乎來

一作歌

秋風思歸客

自梁園至劭亭山見會公談陵陽山水兼期

同遊因有此贈

宣州作

我隨秋風來瑤草恐衰歇中途寡名山安得弄雲月
渡江如昨日黃葉向人飛劭亭愜素尚弭棹流清輝
冰谷明且秀陵巒抱江城粲粲吳與史衣冠耀天京
水國饒英竒潛光卧幽草會公具名僧所在即為寶
開堂振白拂高論橫青雲雪山掃粉壁墨客多新文
為余話幽棲且述陵陽美天開白龍潭月映清秋水
黃山望石柱突兀誰開張

一作曰桂神星漢西崖請開張

黃鶴久不來

子安在蒼茫東南焉可窮山鳥絕飛處

一作援狄絕行處

稠

壘千萬峯相連入雲去聞此期振策歸來空閉關相
思如明月可望不可攀何當移白足早晚凌蒼山且
寄一書札令余解愁顏

贈友人三首

蘭生不當戶別是閑庭草夙被霜露欺紅榮已先老
謬接瑤華枝結根君王池顧無馨香美叨沐清風吹
餘芳若可佩卒歲長相隨

袖中趙匕首買自徐夫人玉匣閉霜雪經燕復歷秦
其事竟不捷淪落歸沙塵持此願投贈與君同急難

一作寒荆卿一去後壯士多摧殘長號易水上爲我揚波
瀾鑿井當及泉張帆當濟川廉夫唯重義駿馬不勞

鞭人生貴相知何必金與錢

慢世薄功業非無匄月中畫誰浪萬古賢以爲兒童劇
立產如廣費匡君懷長策但苦山北寒誰知道南宅
歲酒上逐風霜鬢兩邊白蜀主思孔明晉家望安石
時來列五鼎談笑期一擲虎伏避胡塵漁譚遊海濱
弊裘耻妻嫂長劍託交親夫子秉家義羣公難與鄰
莫持西江水空許東溟巨他日青雲去黃金報主人

陳情贈友人

延陵有寶劍價重千黃金觀風歷上國暗許故人深
歸來挂墳松萬古知其心懦夫感達節壯氣激素衿
鮑生薦夷吾一舉致齊相斯人無良朋豈有青雲望

臨財不苟取推分固辭讓後世稱其賢英風邈難尚
論交但若此有道孰去喪多君騁逸藻掩映當時人
舒文振頽波秉德冠彝倫卜居乃此地共井為比鄰
清琴弄雲月美酒娛冬春薄德中見捐忽之如遺塵
英豪未豹變自古多艱辛他人縱以踈君意宜獨親
柰何成離居相去復幾許飄風吹雲霓蔽目不得語
投珠冀有報按劍恐相拒所思采芳蘭欲贈隔荆_{一作}
渚沉憂心若醉積恨淚如雨願假東壁輝餘光照貧女

贈從弟冽

楚人不識鳳重_{一作高}價求山雞獻主昔古是今來方覺
迷自居漆園北久別咸陽西風飄落日去節變流鶯

啼桃李寒未開幽關豈來蹊逢君發花萼若與青雲
齊及此桑葉綠春蠶起中閨日出撥穀鳴田家擁鋤
犁顧余乏尺土東作誰相攜傳說降霖雨公輸造雲
梯羌戎事未息君子悲塗泥報國有長策成功羞執
珪無由謁明主杖策還蓬藜他年爾相訪知我在磻溪

贈閻丘處士

賢人有素業乃在沙塘陂竹影掃秋月荷衣落古池
閑讀山海經散帙卧遙帷且耽田家樂遂曠_{一作廣}林中期
野酌勸芳酒園蔬烹露葵如能樹桃李為我結茅茨

贈錢徵君少陽

_{一作送趙雲卿}

白玉一盃酒綠楊三月時春風餘幾日兩鬢各成絲

秉燭唯須飲投竿也未遲如逢渭水獵猶可帝王師

贈宣州靈源寺沖濬公

敬亭白雲氣秀色連蒼梧下映雙溪水如天落鏡湖
此中積龍象獨許濬公殊風韻逸江左文章動海隅
觀一作心同水月解領得明珠今日逢支道高談出有無

贈僧朝美

水客凌洪波長鯨湧溟海百川隨龍舟噓噲竟安在
中有不死者探得明月珠高價傾宇宙餘輝照江湖
苞卷金縷褐蕭然若空無誰人識此寶竊笑有狂夫
了心何言說各勉黃金軀

贈僧行融

梁日湯惠休常從鮑照遊峨眉史懷一獨映陳公出
卓絕二道人結交鳳與麟行融亦俊發吾知有英骨
海若不隱珠驪龍吐明月大海乘虛舟隨波任安流
詩賦旃檀閣縱酒鸚鵡洲待我適東越相攜上白樓

贈黃山胡公求白鷗并序

聞黃山胡公有雙白鷗蓋是家雞所伏自小馴狎了
無驚猜以其名呼之皆就掌取食然此鳥耿介尤難
畜之余平生酷好竟莫能致而胡公輟贈於我唯求
一詩聞之欣然適會宿意因援筆三叫文不加點以
贈之

請以雙白璧買君雙白鷗白鷗白如錦白雪恥容顏

照影玉潭裏刷毛琪樹間夜棲寒月靜朝步落花閑
我願得此鳥翫之坐碧山胡公能輟贈籠寄野人還

登敬亭山南望懷古贈竇主簿

敬亭一迴首目盡天南端仙者五六人常聞此遊盤
谿流琴高水石聳麻姑壇白龍降陵陽黃鶴呼子安
羽化騎日月雲行翼駕鸞下視宇宙間四溟皆波瀾
決絕目下事從之復何難百歲落半途前期浩漫漫
強食不成味清晨起長歎願隨子明去鍊火燒金丹

贈汪倫

白游涇縣桃花潭村人汪倫常醞美酒以待白倫之裔孫至今寶其詩

李白乘舟將欲行忽聞岸上踏歌聲桃花潭水深千
尺不及汪倫送我情

經亂後將避地剡中留贈崔宣城

雙鵝飛洛陽五馬渡江徼何意上東門胡鷄更長嘯
中原走豺虎烈火焚宗廟太白晝經天頽陽掩餘照
王城皆蕩覆卅路成奔峭四海望長安頰眉寡西笑
蒼生疑落葉白骨空相弔連兵似雪山破敵誰能料
我垂北溟翼且學南山豹崔子賢主人歡娛每相召
胡床紫玉笛却坐青雲叫楊花滿州城置酒同臨眺
忽思剡溪去水石遠清妙雪晝天地明風開湖山貌
悶爲洛生詠醉發吳越調赤霞動金光日足森海嶠
獨散萬古意閑垂一溪釣猿近天上啼人移月邊棹
無以墨綬苦來求丹砂要華髮長折腰將貽陶公誚

獻從叔當塗宰陽冰

當塗

金鏡霾六國亡新亂天經焉知高光起自有羽翼生
蕭曹安峴岬耿賈摧攬搶吾家有季父傑出聖代英
雖無三台位不借四豪名激昂風雲氣終協龍虎精
弱冠燕趙來賢彥多逢迎魯連擅談笑季布折公卿
遙知禮數絕常恐不合并惕想結宵夢素心久已冥
顧慙青雲器謬奉玉樽傾山陽五百年綠竹忽再榮
高歌振林木大笑喧雷霆落筆灑篆文崩雲使人驚
吐辭又炳煥五色羅華星秀句滿江國高才挾天庭
宰邑艱難時浮雲空古城居人若薙草掃地無纖莖
惠澤及飛走農夫盡歸耕廣漢水萬里長流玉琴聲

寄上

安陸白兆山桃花巖寄劉侍御

許侍御

雲卧三十年好閑復愛仙蓬壺雖冥絕鸞鶴心悠然
歸來桃花巖得憩雲牕眠一本云幼採紫房談早愛
滄溟仙心跡頗相誤世事
空徂遷歸來丹巖對嶺人共語飲潭猿相連時昇翠
曲得憩青霞眼微上邀若羅浮巔兩岑抱東壑一嶂橫西天樹雜日

易隱崖傾月難圓芳草換野色飛蘿搖春煙入遠構
石室選幽開山田獨此林下意杳無區中緣永辭霜
臺客一作繡衣客千載方來旋

淮南卧病書懷寄蜀中趙徵君蕤淮南

吳會一浮雲飄如遠行客一作萬里無主客功業莫從
就歲光屢奔迫良圖俄棄捐衰疾乃繇劇古琴藏虛
匣長劔挂空壁楚懷奏鍾儀越吟比莊舄一作舄與恨已久
逾發思積國門遙天外鄉路遠山隔朝憶相如臺夜夢子
雲宅旅情初結緝一作如結骨秋氣方寂歷風入松下清
露出草間白故人不在此一作不見而我一作幽誰與適
寄書西飛鴻贈爾慰離析

寄弄月溪吳山人

嘗聞龐德公家住河湖水終身栖鹿門不入襄陽市
夫君弄明月滅景清淮裏高蹤邈難追可與古人比
清揚杳莫覩白雲空望美待我辭人間攜手訪松子

秋山寄衛尉張卿及王徵君會稽

何以折相贈白花青桂枝月華若夜雪見此令人思
雖然剡溪興不異山陰時明發懷二子空吟招隱詩

望終南山寄紫閣隱者長安

出門見南山引領意無限秀色難為名蒼翠日在眼
有時白雲起天際自舒卷心中與之然託興每不淺
何當造幽人滅跡棲絕巘

夕霽杜陵登樓寄韋絲

浮陽滅霽景萬物生秋容登樓送遠目伏檻觀羣峯
原野曠超緬關河紛錯重清輝映竹日一作水竹翠色明
雲松蹈海寄遐想還山迷舊蹤徒然迫晚暮未果諧
心曾結桂空佇立折麻恨莫從一作舉游蘭恨莫從誰思君
達永夜長樂聞踈鍾

秋夜宿龍門香山寺奉寄王方城十七丈奉

國瑩上人從弟幼成令問洛陽

朝發汝海東暮棲龍門中水寒夕波急木落秋山空
望極九霄迥賞幽萬壑通日皓沙上月心清松下作
裏風玉斗生一作橫網戶銀何耿花宮興在趣方逸歡

餘情未終一作微鳳駕憶王子虎溪懷遠公
桂枝坐蕭瑟一作銷歇棣華不復同流恨一作浪寄伊水盈
盈焉可窮

春日獨坐寄鄭明府

驚麥青青遊子悲河堤弱柳鬱金枝長條一拂春風
去盡日飄揚無定時我在河南別離久那堪對此當
窓牖情人道來音不來何人共醉新豐酒

寄淮南友人

紅顏悲舊國青歲歇芳洲不待金門詔空持寶劍遊
海雲迷驛道江月隱鄉樓復作淮南客因逢桂樹留

沙丘城下寄杜甫齊魯

李十一
我來竟何事高卧沙丘城城邊有古樹日夕連秋聲
魯酒不可醉齊歌空復情思君若汶水浩蕩寄南征
聞丹丘子於城北山營石門幽居中有高鳳
遺跡僕離羣遠懷亦有棲遁之志因敘舊以
寄之

春華一作弄滄江月秋色碧海雲離居盈寒暑對此長
思君思君楚水南望君淮山北夢魂雖飛來會面不
可得疇昔在嵩陽同衾卧羲皇綠蘿笑簪紱丹壑賤
巖廊晚途各分析乘興任所適僕在鴈門關君爲峨
眉客心懸萬里外影滯兩鄉隔長劍復歸來相逢洛
陽陌陌上何喧喧都令心意煩迷津覺路失託勢隨

風翻以茲謝朝列長嘯歸故園故園恣閑逸求古散
縹帙久欲入尋一作尋名山婚娶殊未畢人生信多故世
事豈惟一念此憂如焚悵然若有失聞君卧石門宿
昔契彌敦方從桂樹隱不羨桃花源高鳳起遐曠幽
人跡復存松風清瑤瑟溪月湛芳樽安居偶佳賞丹
心期此論

李太白文集卷第十一

吳門繆曷武子甫重刊宋本

李太白文集卷第十二

歌詩四十首

寄下

淮陰書懷寄王宗成一首

再至淮南一作王宋城

沙墩至梁苑二十五長亭大舶夾雙櫓中流鵝鷺鳴
雲天掃空碧川岳涵餘清飛鳥從西來適與佳興并
眷言王喬鳥婉孌故人情復此親懿會而增交道榮
泓洄且不定飄忽悵徂征暝投淮陰宿欣得漂母迎
斗酒烹黃雞一食感素誠予爲楚壯士不是魯諸生
有德必報之千金取爲輕緬書羈孤意遠寄棹歌聲
聞王昌齡左遷龍標遙有此寄

揚州花落一作揚州花落盡子規啼聞道龍標過五溪我寄愁
心與明月隨君直到夜郎西

寄王屋山人孟大融

我昔東海上勞山食紫霞親見安期公食棗大如瓜
中年謁漢主不愜還歸家朱顏謝春暉白髮見生涯
所期就金液飛步登雲車願隨夫子天壇上閑與仙
人掃落花

憶舊游寄譙郡元參軍金陵

憶昔洛陽董糟丘爲余天津橋南造酒樓黃金白壁
買歌笑一醉累月輕王侯海內賢豪青雲客就中與
君一作與君心莫逆迴山轉海不作難傾情倒意無所

惜我向淮南攀桂枝君留洛北愁夢思不忍別還相
隨相隨迢迢訪仙城三十六曲水迴縈一溪初入千
花明萬壑度盡松風聲銀鞍金絡到平地漢東太守
來相迎紫陽之真人邀我吹玉笙餐霞樓上動仙樂
嘈然宛似鸞鳳鳴袖長管催欲輕舉漢中太守醉起
舞一作漢東太守手持錦袍覆我身我醉橫眠枕其股
當筵意氣凌九霄星離雨散不終朝分飛楚關山水
遙余既還山尋故巢君亦歸家度渭橋君家嚴君勇
貔虎作尹并州遏戎虜五月相呼度太行摧輪不道
羊腸苦行來北涼歲月深感君貴義輕黃金瓊杯綺
食青玉椀使我醉飽無歸心時時出向城西曲晉祠

流水如碧玉浮舟弄水簫鼓鳴微波龍鱗莎草綠興
來攜妓恣經過其若楊花似雪何紅鮮一作糝欲醉宜
斜日一作花落如百尺清潭寫翠娥翠娥嬋娟初月輝美
人更唱舞羅衣清風吹歌入空去歌曲自繞行雲飛
此時行一作樂難再遇西遊因獻長楊賦北闕青雲
不可期東山白首一作還歸去渭橋南頭一作橋南一
遇君鄼臺之比又離羣問余別恨今多少落花春暮
爭紛紛一作樹落花送客何紛紛一作言情一作亦不可盡情一作
言亦不可極呼兒長跪緘此辭寄君千里遙相憶

月夜江行寄崔貞外宗之

飄飄江風起蕭颯海樹秋登壚美清夜挂席移輕舟

月隨碧山轉水合青天流杳如一作然一作星河上但覺雲
林幽歸路方浩浩徂川去悠悠徒悲蕙草歇復聽菱
歌愁岸曲迷後浦沙明瞰前洲懷君不可見望遠增
離憂

宿白鷺洲寄楊江寧

朝別朱雀門暮棲白鷺洲波一作沙光搖海月星影入
城樓望美金陵宰如思瓊樹憂徒令魂作夢翻覺夜
成秋綠水解人意爲余西北流因聲玉琴裏蕩漾寄
君愁

新林浦阻風寄友人

潮水定可信天風難與期清晨西北轉薄暮東南吹

一書懷寄楊江寧

以此難挂席佳期益相思一本云以此難挂席泗水

賢宰知絃歌止過海月破圓一作景菰蔣生綠池昨

日北湖梅開花已滿枝一作昨日北湖今朝一作白

門柳夾道垂青絲歲物忽如此我來定一作復幾時紛

紛江上雪草草客中悲明發新林浦一作橋浦空吟謝

眺詩

寄韋南陵冰余江上乘興訪之遇尋顏尚書

笑有此贈

南船正東風北船來自緩江上相逢借問君語笑一作

聲未了風吹斷聞君攜妓訪情人應為尚書不顧身

堂上三千珠履客甕中百斛金陵春恨我阻此樂淹

留楚一作江濱月色醉遠客山花開欲燃春風狂殺

人一日劇三年乘興嫌太遲焚却子猷船夢見五柳

枝已堪挂馬鞭何日到彭澤長一作狂歌陶令前

題情深樹寄象公

腸斷枝上猿淚添山下樽白雲見我去亦為我飛翻

北山獨酌寄韋六

巢父將許由未聞買山隱道存跡自高何憚去人近

紛吾下茲嶺地閑誼亦泯門橫羣岫開水鑿眾泉引

屏高而在雲竇深莫能準川光晝昏凝林氣夕淒緊

於焉摘朱果兼得養玄牝坐月觀寶書拂霜弄瑤軫

傾壺事幽酌顧影還獨盡念君風塵遊傲爾令自哂

一作安知世上
人名利空蠹蠹

寄當塗趙少府炎

晚登高樓望木落雙江清
寒山饒積翠秀色連州城
目送楚雲盡心悲胡鴈聲
相思不可見迴首故人情

寄東魯二稚子

在金陵作

吳地桑葉綠吳蠶已三眠
我家寄東魯誰種龜陰田
春事已不及江行復茫然
南風吹歸心飛墮酒樓前
樓東一株桃枝葉拂青煙
此樹我所種別來向三年
桃今與樓齊我行尚未旋
嬌女字平陽折花倚桃邊
折花不見我淚下如流泉
小兒名伯禽與姊亦齊肩
雙行桃樹下撫背復誰憐
念此失次第肝腸日憂煎
裂素寫遠意因之汶陽川

獨酌青溪江石上寄權昭夷

秋注

我攜一樽酒獨上江祖石
自從天地開更長幾千尺
舉杯向天笑天迴日西照
永願坐此石長垂嚴陵釣
寄謝山中人可與爾同調

禪房懷友人岑倫南遊羅浮兼泛桂海自春
徂秋不返僕旅江外書情寄之

潯陽

嬋娟羅浮月搖艷桂水雲
美人竟獨往而我安能羣
一朝語笑隔萬里懽情分
沉吟綵霞沒夢寐瓊芳歇
歸鴻度三湘遊子在百越
邊塵染衣劔白日凋華髮
春氣變楚關秋聲落吳山
草木結悲緒風沙淒苦顏

劫來已永久，頽思如循環。飄飄限江裔，想像空留滯。
離憂每醉心，別淚徒盈袂。坐愁青天末，出望黃雲蔽。
目極何悠悠，梅花南嶺頭。空長滅征鳥，水闊無還舟。
寶劍終難託，金囊非易求。歸來儻有問，桂樹山之幽。

廬山謠寄盧侍御虛舟

我本楚狂人，鳳謠笑一作哭孔丘。手持綠玉杖，一作枝朝別黃鶴樓。五嶽尋仙不辭遠，一生好入名山遊。廬山秀出南斗傍，屏風九疊雲錦張。影落明湖青黛光，金闕前開二峯帳。銀河倒挂一作瀉三石梁，香爐瀑布遙相望。迴崖沓嶂凌何何，蒼蒼翠影紅霞映。朝日千里馬飛不到吳天長，登高壯觀天地間。大江茫茫去不

還黃雲萬里動，風色白波九道流。雪山好為廬山謠，興因廬山發。閑窺石鏡清我心，謝公行處蒼苔沒。一作懸蘿開處早服還丹無世情，琴心三疊道初成。遙見仙人綵雲裏，手把芙蓉朝玉京。先期汗漫九垓上，願接盧敖遊太清。

下尋陽城汎彭蠡寄黃判官

浪動灌嬰井，尋陽一作吾知江上風。開帆入天鏡，直向彭湖東。落景轉疎雨，晴雲散遠空。名山發佳興，一作景照疎虹一作壁遙山挂彩虹。相思俱對此，舉目與君同。

書情寄從弟邠州長史昭

自笑客行久我行定幾時綠楊已可折攀取最長枝
翩翩翻一作弄春色延佇寄相思誰言貴此物意願作
厚重瓊蕤昨夢見惠連朝吟謝公詩東風引碧草不
覺生華池臨翫忽云夕杜鵑夜鳴悲懷君芳歲歇庭
樹落紅滋

寄上吳王三首

淮王愛八公攜手綠雲中小子添枝葉亦攀丹桂叢
謬以詞賦重而將枚馬同何日背淮水東之觀土風
坐嘯廬江靜閑聞進玉觴去時無一物東壁挂胡床
英明廬江守聲譽廣平籍掃灑黃金臺招邀青雲客
客曾與天通出入清禁中襄王憐宋玉願入蘭臺宮

寄王漢陽

南湖秋月白王宰夜相邀錦帳郎官醉羅衣舞女驕
笛聲誼沔鄂歌曲上雲霄別後空愁我相思一水遙
春日歸山寄孟六浩然

朱紱遺塵境青山謁梵筵金繩開覺路寶筏度迷川
嶺樹攢飛栢岵花覆谷泉塔形標海日樓勢出江煙
香氣三天下鍾聲萬壑連荷秋珠已滿松密蓋初圓
鳥聚疑聞法龍參若護禪愧非流水韻叨入伯牙絃

流夜郎永華寺寄尋陽羣官流夜郎

朝別凌煙樓賢豪滿行舟暝投永華寺賓散予獨醉
願結九江流添成萬行淚寫意寄廬嶽何當來此地

天命有所懸安得苦愁思

流夜郎至西塞驛寄裴隱

上峽

揚帆借天風水驛苦不緩平明及西塞已先投沙伴
迴巖引羣峯橫蹙楚山斷砮衝萬壑會震沓百川滿
龍怪潛溟波候時救炎旱我行望雷雨安得露枯散
鳥去天路長人悲春光短空將澤畔吟寄爾江南管

自漢陽病酒歸寄王明府

回江夏

去歲左遷夜郎道琉璃硯水長枯槁今年勅放巫山
陽蛟龍筆翰生輝光聖主還聽子虛賦相如却欲論
文章願掃鸚鵡洲與君醉百場嘯起白雲飛七澤歌
吟綠水動三湘莫惜連船沽美酒千金一擲買春芳

望漢陽柳色寄主宰

漢陽江上柳望客引東枝樹樹花如雪紛紛亂若絲
春風傳我意草木度前知

一作草木發前輝

寄謝絃歌宰西

來定未遲

江夏寄漢陽輔錄事

誰道此水廣狹如一匹練江夏黃鶴樓青山漢陽縣
大語猶可聞故人難可見君草陳琳檄我書魯連箭
報國有壯心龍顏不迴眷西飛精衛鳥東海何由填
鼓角徒悲鳴樓船習征戰抽劔步霜月夜行空庭徧
長呼結浮雲埋沒顧榮扇他日觀軍容投壺接高宴

早春寄王漢陽

聞道春還未相識走傍寒梅訪消息昨夜東風入武
陽一作陌頭楊柳黃金色碧水浩浩雲茫茫美人不
來空斷腸預拂青山一片石與君連日醉壺觴

江上寄巴東故人

漢水波浪遠巫山雲雨飛東風吹客夢西落此中時
覺後思白帝佳人與我違瞿塘饒賈客音信莫令希

江上寄元六林宗

霜落江始寒楓葉綠未脫客行悲清秋永路苦不達
滄波眇川汜白日隱天末停棹依林巒鷲猿相叫聒
夜分河漢轉起視溟漲闊涼風何蕭蕭流水鳴活活
浦沙淨如洗海月明可掇蘭交空懷思瓊樹詎解渴

勗哉滄洲心歲晚庶不奪幽賞頗自得興遠與誰豁
寄從弟宣州長史昭

爾佐宣城郡守官清且閑常誇雲月好邀我敬亭山
五落洞庭葉三江遊未還相思不可見歎息損朱顏

涇溪東亭寄鄭少府諤宣城

我遊東亭不見君沙上行將白鷺羣白鷺閑時散飛
去又如雪點青山雲欲往涇溪不辭遠龍門蹙波虎
眼轉杜鵑花開春已闌歸向陵陽釣魚晚

宣城九日聞崔四侍御與宇文太守遊敬亭

余時登響山不同此賞醉後寄崔侍御二首
九日茱萸熟插鬢傷早白登高望山海滿目悲古昔

遠訪投沙人因為逃名客故交竟誰在獨有崔亭伯
重陽不相知載酒任所適手持一枝菊調笑二千石
日暮岸幘歸傳呼隘阡陌彤檐雙白鹿賓從何輝赫
夫子在其間遂成雲霄隔良辰與美景兩地方虛擲
晚從南峯歸蘿月下水壁却登郡樓望松色寒轉碧
咫尺一作美不可親棄我如遺鳥

九卿天上落五馬道傍來列戟朱門曉褰帷碧嶂開
登高望遠海召客得英才紫絲歡情洽黃花逸興催
山從圖上見溪即向一作鏡中迴遙羨重陽作應過戲
馬臺

寄崔侍御

寄王漢陽

南湖秋月白王宰夜相邀錦帳郎官醉羅衣舞女驕
笛聲誼沔鄂歌曲上雲霄別後空愁我相思一水遙
春日歸山寄孟六浩然

朱紱遺塵境青山謁梵筵金繩開覺路寶筏度迷川
嶺樹攢飛栢岳花覆谷泉塔形標海日樓勢出江煙
香氣三天下鍾聲萬壑連荷秋珠已滿松密蓋初圓
鳥聚疑聞法龍參若護禪愧非流水韻叨入伯牙絃

流夜郎永華寺寄潯陽羣官

流夜郎

朝別凌煙樓賢豪滿行舟暝投永華寺賓散予獨醉
願結九江流添成萬行淚寫意寄廬嶽何當來此地

天命有所懸安得苦愁思

流夜郎至西塞驛寄裴隱

上峽

揚帆借天風水驛苦不緩平明及西塞已先投沙伴
迴巒引羣峯橫蹙楚山斷硤衝萬壑會震沓百川滿
龍怪潛溟波候時救炎旱我行望雷雨安得霑枯散
鳥去天路長人悲春光短空將澤畔吟寄爾江南管

自漢陽病酒歸寄王明府

回江夏

去歲左遷夜郎道琉璃硯水長枯槁今年勃放巫山
陽蛟龍筆翰生輝光聖主還聽子虛賦相如却欲論
文章願掃鸚鵡洲與君醉百場嘯起白雲飛七澤歌
吟綠水動三湘莫惜連船沽美酒千金一擲買春芳

三山懷謝朓水澹

一作綠水

望長安蕪沒河陽縣秋江正

北看盧龍霜氣冷鵙鵲月光寒耿耿憶瓊樹天涯寄
一歡

自金陵泝流過白壁山翫月達天門寄句容

王主簿

滄江泝流歸白壁見秋月秋月照白壁皓如山陰雪
幽人停宵征賈客忘早發進帆天門山迴首牛渚沒
川長信風來日出宿霧歇故人在咫尺新賞成胡越
寄君青蘭花惠好庶不絕

李太白文集卷第十二

吳門繆是武子甫重刊宋本

李太白文集卷第十三

歌詩三十六首

別

秋日魯郡堯祠亭上宴別杜補闕范侍御

我覺秋興逸誰去秋興悲山將落日去水與晴空宜

魯酒白玉壺送行駐金羈歇鞍憇古木解帶挂橫枝

歌鼓川上亭曲度神飈吹一本无歌鼓川上亭曲度

鄧容東轉見齊姬清波忽澹蕩白雪雲歸碧海夕鴈

沒青天時相失各萬里茫然空爾思

留別魯頌

誰道太山高下却魯連節誰去秦軍衆摧却魯連舌

獨立天地間清風灑蘭雪夫子還個儻攻文繼前列
錯落石上松無為秋霜折贈言鏤寶刀千歲庶不滅

別中都明府兄

吾兄詩酒繼陶君試宰中都天下聞東樓喜奉連枝
會南陌還為落葉分城隅一作江城淶水明秋日海上青
山隔暮雲取醉不辭留夜月鴈行中斷惜離羣

夢遊天姥吟留別一作別東魯諸公

海客談瀛洲煙濤微茫一作瀟灑信難求越人語一作道天
姥雲霓明滅或一作安可觀天姥連天向天橫勢拔一作
枝五岳掩赤城天台四萬八千丈對此欲一作絕倒東
南傾我欲因之一作與夢吳越一夜飛度鏡湖月胡月

照我影送我至剡谿謝公宿處今尚在淶水蕩漾清
猿啼脚著謝公屐身登青雲梯半壁見海日空中聞
天雞千巖萬轉路不定迷花倚石忽已暝熊咆龍吟
殷巖泉慄深林兮驚層巔雲一作青青兮欲雨水澹
澹兮生煙列缺霹靂丘壑崩摧洞天石扇一作扉訇然
中一作而開青冥浩蕩不見底日月照耀金銀臺霓為
衣兮鳳為馬雲之君兮紛紛而來下虎鼓瑟兮鸞回
車仙之人兮列如麻忽魂悸以魄動恍驚起而長嗟
惟覺時之枕席失向來之煙霞世間行樂亦如此古
來萬事東流水別君去兮何時還且放白鹿青崖間
須行即騎訪名山安能摧眉折腰事權貴使我不得

李十三
二
開心顏

留別曹南羣官之江南

我昔釣白龍放龍溪水傍道成奉欲去揮手凌蒼蒼
時來不關人談笑遊軒皇獻納少成事歸休辭建章
十年罷西笑覽鏡如秋霜閉劍琉璃匣鍊丹紫翠房
身佩豁落圖腰垂虎盤囊仙人借綵鳳志在窮遐荒
戀子四五人徘徊未翱翔東流送白日驟歌蘭蕙芳
仙宮兩無從人間久摧藏范蠡脫勾踐屈平去懷王
飄飄紫霞心流浪憶江鄉愁為萬里別復此一銜觴
淮水帝王州金陵繞丹陽樓臺照海色衣馬搖川光
及此北望君相思淚成行朝雲落夢渚瑤草空高唐

帝子隔洞庭青楓滿瀟湘懷歸路縣邈覽古情淒涼
登岳眺百川杳然萬恨長却戀峨眉云弄景偶騎羊

留別于十一兄述裴十三遊塞垣

太公渭川水李斯上蔡門釣周獵秦安黎元小魚鮑
兔何足言天張雲卷有時節吾徒莫歎抵觸藩于公
白首大梁野使人悵望何可論既知朱亥為壯士且
願束心秋毫裏秦趙虎爭血中原當去抱關救公子
裴生覽千古龍鸞炳天章悲一作高吟雨雪動林木放
書輟劍思悲一作高堂勸爾一盃酒拂爾裘上霜爾為
我楚舞吾為爾楚歌且探虎穴向沙漠鳴鞭走馬凌
黃河恥作易水別臨歧淚滂沱

留別王司馬嵩

魯連賣談笑豈是顧千金陶朱雖相越本有五湖心
余亦南陽子時為梁甫吟蒼山容偃蹇白日惜頽侵
願一佐明主功成還舊林西來何所為孤劍託知音
鳥愛碧山遠一作鳳集魚遊滄海深呼鷹過上蔡賣
畚向嵩岑他日閑相訪丘中有素琴

還山留別金門知己

一本云出金門後書
懷留別翰林諸公

好古笑流俗素聞賢達風方希佐明主長揖辭成功
白日在青天迴光矚一作照微躬恭承鳳凰詔歛起雲
羅一作藤蘿中清切紫霄迥優遊丹禁通君王賜顏色聲
價凌烟虹乘輿擁翠蓋扈從金城東寶馬驟一作麗絕

景錦衣入新豐倚巖望松雪對酒鳴絲桐方一作因學

揚子雲獻賦甘泉宮天書美片善清芳一作芬播無窮

歸來入咸陽譚笑皆王公一朝去金馬飄落成飛蓬

賓友一作從日踈散玉樽亦一作尋已空長才一作才猶可

倚不慙世上雄閑來東武吟曲盡情未終書此謝知

已扁舟一作滄波尋釣翁

夜別張五

吾多張公子別酌酣高堂聽歌舞銀燭把酒輕羅霜
橫笛弄秋月琵琶彈陌桑龍泉解錦帶為爾傾千觴

魏郡別蘇少府因北游

魏都接燕趙美女誇芙蓉淇水流碧玉舟車日奔衝

青樓夾兩岸萬室喧歌鍾天下稱豪貴一作豪遊遊此

一作中每相逢洛陽蘇季子劍戟森詞鋒六印雖未佩

復一作秦軒車若飛龍黃金數百鎰白璧有幾雙散

盡空掉臂高歌賦還一作臨叩合從又連橫其意未可

封落拓乃如此何一作誰人不相從遠別隔兩河雲山

杳千重一作雲天何時更盃酒再得論心曾

留別西河劉少府

秋一作我髮已種種所為竟無成閑傾魯壺酒笑對劉

公榮謂我是方朔人間落歲星白衣千萬乘何事去

天庭君亦不得意高歌羨鴻冥世人若醯雞安可識

梅生雖為刀筆吏緬懷在赤城余亦如流萍隨波樂

休明白有兩少妾雙騎駿馬行東山春酒綠歸隱謝

浮名

潁陽別元丹丘之淮陽河南

吾將元夫子異姓為天倫本無軒裳契素以烟霞親

嘗恨迫世網銘意俱未伸松栢雖寒苦羞逐桃李春

悠悠市朝間玉顏日緇磷所共重山岳所得輕埃塵

精魄漸蕪穢衰老相憑因我有錦囊訣可以持君身

當餐黃金藥去為紫陽賓萬事難並立百年猶崇晨

別爾東南去悠悠多悲辛前志庶不易遠途期所遵

已矣歸去來白雲飛天津

留別廣陵諸公淮南一作留

別邯鄲故人

李十三
三
憶昔作少年結交趙與燕金羈絡駿馬錦帶橫龍泉
寸心無疑事所向非徒然晚節覺此踈獵精草太玄
空名東壯士薄俗棄高賢中迴聖明顧揮翰凌雲煙
騎虎不敢下攀龍忽墮天還家守清真孤潔勵秋蟬
鍊丹費火石採藥窮山川卧海不關人租稅遼東田
乘興忽復起棹我溪中船臨醉謝葛強山公欲倒鞭
狂歌自此別垂釣滄浪前

廣陵贈別

玉瓶沽美酒數里送君還繫馬垂楊下銜盃大道間
天邊看綠水海上見青山興罷各分袂何須醉別顏

感時留別從兄徐王延年

一作延平從弟延陵

天籟何參差噫然大塊吹玄元苞橐籥紫氣何逶迤
融一作七葉運皇化千齡光本枝仙風生指樹大雅歌
螽斯諸王若鸞虬肅穆列藩維哲兄錫茅土聖代含
榮滋九卿領徐方七步繼陳思伊昔全盛日雄豪動
京師冠劍朝鳳闕樓船侍龍池鼓鐘出朱邸金翠照
丹墀君王一顧眄選色獻蛾眉列戟十八年未曾輒
遷移大臣小暗鳴謫竄天南垂長沙不足舞貝錦且
成詩佐郡浙江西病閑絕趨馳階軒日苔蘚鳥雀噪
簷帷時乘平肩輿出入畏人知北宅聊偃憩歡愉恤
惇嫠羞言梁苑地烜赫耀旌旗兄弟八九人吳秦各
分離大賢達機兆豈獨慮安危小子謝麟閣鴈行忝

肩隨令弟字延陵鳳毛出天姿清英神仙骨芬馥
蘭蕤夢得春草句將非惠連誰深心紫河車與我特
相宜金膏猶罔象玉液尚磷緇伏枕寄賓館宛同清
漳湄藥物多見饋珍羞亦兼之誰道溟渤深猶言淺
恩慈鳴蟬游子意促織念歸期驕陽何火赫海水爍
龍龜百川盡凋枯舟楫閣中逵策馬採涼月通宵出
郊歧泣別目眷眷傷心步遲遲願言保明德王室佇
清夷摻袂何所道援毫投此辭

別儲邕之剡中

借問剡中道東南指越鄉舟從廣陵去水入會稽長
竹色溪下綠荷花鏡裏香辭君向天姥拂石卧秋霜

留別金陵諸公

金陵

海水昔飛動三龍紛戰爭鍾山危波瀾傾側駭奔鯨
黃旗一掃蕩割壤開吳京六代更霸王遺跡見都城

一作遺都
見空城

至今秦淮間禮樂秀羣英地扇鄒魯學詩

騰顏謝名五月金陵西祖余白下亭欲尋廬峯頂先
繞漢水行香爐紫煙滅瀑布落太清若攀星辰去揮
手緬含情

口號

食出野田美酒臨遠水傾東流若未盡應見別離情

金陵酒肆留別

白門柳花滿

一作酒

店香吳姬豎酒喚客嘗金陵子弟

來相送欲行不行各盡觴請君問取東流水別意與之誰短長

金陵白下亭留別

驛亭三楊樹正當白下門吳煙暝長條漢水齧古根向來送行處迴首阻笑言別後若見之為余一攀翻

別東林寺僧

東林送客處月出白猿啼笑別廬山遠何煩過虎谿

竄夜郎於烏江留別宗十六璟

疑烏江及宗字誤

君家全盛日台鼎何陸離斬鼉翼媧皇鍊石補天維一迴日月顧三入鳳凰池失勢青門傍種瓜復幾時猶會舊賓客三千光路歧皇恩雪憤懣松柏含榮滋

我非東林人令姊忝齊眉浪迹未出世空名動京師適遭雲羅解翻謫一作遣夜郎悲拙妻莫邪劍及此二龍隨慙君湍波苦千里遠從之白帝曉猿斷黃牛過客遲遙瞻明月峽西去益相思

留別龔處士

龔子棲閑地都無人世喧柳深陶令宅竹暗辟疆園我去黃牛峽遙愁白帝猿贈君卷施草心斷竟何言

贈別鄭判官

竄逐勿復哀慙君問寒灰浮雲無本意吹落章華臺遠別淚空盡長愁心已摧三年吟澤畔顛顛幾時迴

黃鶴樓送孟浩然之廣陵

江夏岳陽

故人西辭黃鶴樓，煙花三月下揚州。孤帆遠影映一作碧山盡，唯見長江天際流。

將遊衡岳過漢陽雙松亭留別族弟浮屠談皓
秦欺趙氏璧，却入邯鄲宮。本是楚家玉，還來荆山中。
符彩照滄溟，精輝陵白虹。青蠅一相點，流落此時同。
卓絕道門秀，談玄乃支公。延蘿結幽居，剪竹繞芳叢。
涼花拂戶牖，天籟一作鳴。虛空憶我初來時，蒲萄開
景風，今茲大火落。秋葉黃，梧桐水色夢沅湘。長沙去
何窮，寄書訪衡嶠，但與南飛鴻。

江夏別宋之悌

楚水清若空，遙將碧海通。人分千里外，興在一盃中。

谷鳥吟晴日，江猿嘯晚風。平生不下淚，於此泣無窮。

留別賈舍人至二首

大梁白雲起，飄飄來南洲。徘徊蒼梧野，十見羅浮秋。
鼇抃山海傾，四溟揚洪流。意欲託孤鳳，從之摩天遊。
鳳苦道路難，翱翔還崑丘。不肯銜我去，哀鳴慙不周。
遠客謝主人，明珠難暗投。拂拭倚天劍，西登岳陽樓。
長嘯萬里風，掃清曾中憂。誰念劉越石，化為繞指柔。
秋風吹胡霜，凋此蒼簷下。芳折芳怨歲，晚離別悽以傷。
謬攀青瑣賢，延我於此堂。君為長沙客，我獨之夜郎。
勸此一盃酒，豈唯道路長。割珠兩分贈，寸心貴不忘。
何必兒女仁，相看淚成行。

渡荆門送別荊州

九

渡遠荆門外來從楚國遊山隨平野盡江入大荒流
月下飛天鏡雲生結海樓仍憐故鄉水萬里送行舟
聞李太尉大舉秦兵百萬出征東南懦夫請
纓冀申一割之用半道病還留別金陵崔侍

御十九韻復至金陵

秦出天下兵蹴踏燕趙傾黃河飲馬竭赤羽連天明
太尉杖旄鉞雲旗繞彭城三軍受號令千里肅雷霆
函谷絕飛鳥武關擁連營意在斬巨鼉何論鱸長鯨
與鯨恨無左車略多愧魯連生拂劍照嚴霜彫戈
鬣胡纓願雪會稽恥將期報恩榮半道謝病還無因

由一作東南征亞夫未見顧劇孟阻先行天奪壯士心
長吁別吳京金陵遇太守倒履欣一作相逢迎羣公咸
祖餞四座羅朝英初發臨滄觀醉栖征虜亭舊國見
秋月長江流寒聲帝車一作居信迴轉河漢縱復橫孤
鳳向西海飛鴻辭北溟因之出寥廓揮手謝公卿

別韋少府宣州

西出蒼龍門南登白鹿原欲尋南一作商山皓猶戀漢
皇恩水國遠行邁仙經深討論洗心句溪月清耳聳
亭猿築室在人境閉關無世誼多君枉高駕贈我以
微言交乃意氣合道因風雅存別離有相思瑤琴與
金樽

南陵別兒童入京一古古意

白酒新初一作熟山中歸黃雞啄黍秋正肥呼童烹雞
酌白酒兒女歌笑牽人衣高歌取醉欲自慰起舞落
日爭光輝遊說萬乘苦不早著鞭跨馬涉遠道會稽
愚婦輕買臣余亦辭家西一作入秦仰天大笑出門
去我輩豈是蓬蒿人

南陵五松山別荀七

六即潁水荀 慙許郡賓相逢太史奏應是聚賢人
玉隱且在石蘭枯還見春俄成萬里別立德貴清真

別山僧涇縣作

何處名僧到水西乘舟一作弄月宿涇溪平明別我

上山去手攜金策踏雲梯騰身轉覺三天近舉足迴
看萬嶺低謔浪肯居支遁下風流還與遠公齊此度
別離何日見相思一夜瞑猿啼

贈別王山人歸布山

王子析道論微言破秋毫還歸布山隱興入天雲高
爾去安可遲瑤草恐衰歇我心亦懷歸屢夢松上月
傲然遂獨往長嘯開巖扉林壑久已蕪石道生薔薇
願言弄笙鶴歲晚來相依

李太白文集卷第十三

